

四庫全書

史部

欽定四庫全書

宋史卷六十一

元中書右丞相總裁托克托等修

五行志第十四

五行一上 水上

天以陰陽五行化生萬物盈天地之間無非五行之妙  
用人得陰陽五行之氣以為形形生神知而五性動五  
性動而萬事出萬事出而休咎生和氣致祥乖氣致異

莫不於五行見之中庸至誠之道可以前知國家將興  
必有禎祥國家將亡必有妖孽見乎著龜動乎四體禍  
福將至善必先知之不善必先知之人之一身動作威  
儀猶見休咎人君以天地萬物為體禎祥妖孽之致豈  
無所本乎故由漢以來作史者皆志五行所以示人君  
之戒深矣自宋儒周惇頤太極圖說行世儒者之言五  
行原於理而究於誠其於洪範五行五事之學雖非所  
取然班固范曄志五行已推本之及歐陽修唐志亦采

其說且於庶徵惟述災青而休祥闕焉亦豈無所見歟  
舊史自太祖而嘉禾瑞麥甘露醴泉芝草之屬不絕於  
書意者諸福畢至在治世為宜祥符宣和之代人君方  
務以符瑞文飾一時而丁謂蔡京之姦相與傅會而為  
欺其應果安在哉高宗渡南心知其非故宋史自建炎  
而後郡縣絕無以符瑞聞者而水旱札瘥一切咎徵前  
史所罕見皆屢書而無隱於是六主百五十年競競自  
保足以圖存易震之象曰震來虩虩恐致福也人君致

福之道有大於恐懼脩省者乎昔禹致羣臣於會稽黃龍負舟而執玉帛者萬國孔甲好鬼神二龍降自天而諸侯相繼畔商桑穀共生於朝雉升鼎耳而雝而大戊武丁復修成湯之政穆王得白狼白鹿而文武之業衰焉徐偃得朱弓矢宋潛有雀生鷗二國以霸亦以之亡大槩徵之休咎猶卦之吉凶占者有德以勝之則凶可為吉無德以當之則吉乃為凶故德足勝妖則妖不足慮匪德致瑞則物之反常者皆足為妖妖不自作人實

興之哉今因先後史氏所紀休咎之徵彙而輯之作五行志

潤下水之性也水失其性則為災沴舊說以恒寒鼓妖魚孽豕禍雷電霜雪雨電黑青黑祥皆屬之水今從之醴泉河清雖為瑞應苟非其時未必不為異故雜附於編他如甘露嘉禾芝草一切祥瑞之物見于後者因其事而考其時則休咎自見故亦各以類相從云

建隆元年十月棣州河決壞厭次商河二縣居民廬舍

田疇二年宋州汴河溢孟州壞堤襄州漢水漲溢數丈  
四年八月齊州河決九月徐州水損田乾德二年四月  
廣陵揚子等縣潮水害民田七月泰山水壞民廬舍數  
百區牛畜死者甚衆三年二月全州大雨水七月蘄州  
大雨水壞民廬舍開封府河決溢陽武河中府孟州並  
河水漲孟州壞中渾軍營民舍數百區河壞隄岸石又  
溢於鄆州壞民田泰州潮水損鹽城縣民田淄州濟州  
並河溢害鄒平高苑縣民田四年東阿縣河溢損民田

觀城縣河決壞居民廬舍注大名又靈河縣隄壞水東  
注衛南縣境及南華縣城七月滎澤縣河南北隄壞八  
月宿州汴水溢壞堤淄州清河水溢壞高苑縣城溺數  
百家及鄒平縣田舍泗州淮溢衛州大雨水月餘五年  
衛州河溢毀州城沒溺者甚衆開寶元年六月州府二  
十三大雨水江河汎溢壞民田廬舍七月泰州潮水害  
稼八月集州霖雨河漲壞民廬舍及城壁公署二年七  
月下邑縣河決是歲青蔡宿州宋諸州水真定澶滑博



治齊潁蔡陳亳宿許州水害秋苗三年鄭澶鄆淄濟虢  
蔡解徐岳州水災害民田四年六月汴水決宋州穀熟  
縣濟陽鎮又鄆州河及汶清河皆溢注東阿縣及陳空  
鎮壞倉庫民舍鄭州河決原武縣蔡州淮及白露舒汝  
廬潁五水並漲壞廬舍民田七月青齊州水傷田五年  
河決澶州濮陽絳和廬壽諸州大水六月河又決開封  
府陽武縣之小劉村宋州鄭州並汴水決忠州江水漲  
二百尺六年鄆州河決楊劉口懷州河決獲嘉縣潁川

淮淝水溢汜民舍田疇甚衆七月歷亭縣御河決單州  
濮州並大雨水壞州廨倉庫軍營民舍是秋大名府宋  
亮淄青汝澶滑諸州並水傷田七年四月衛毫州水泗  
州淮水暴漲入城壞民舍五百家安陽縣河漲壞居民  
廬舍百區八年五月京師大雨水濮州河決郭龍村六  
月澶州河決頓丘縣沂州大雨水入城壞居舍田苗九  
年三月京師大雨水淄州水害田太平興國二年六月  
孟州河溢壞溫縣堤七十餘步鄭州壞滎澤縣寧王村

堤三十餘步又漲于澶州壞英公村堤三十步開封府  
汴水溢壞大寧堤浸害民田忠州江漲二十五丈興州  
江漲毀棧道四百餘間管城縣焦肇水暴漲踰京水濮  
州大水害民田凡五千七百四十三頃潁州潁水漲壞  
城門軍營民舍七月復州蜀漢江漲壞城及民田廬舍  
集州江漲汎嘉川縣三年五月懷州河決獲嘉縣北注  
又汴水決宋州寧陵縣境六月泗州淮漲入南城汴水  
又漲一丈塞州北門十月滑州靈河已塞復決四年三

月河南府水漲七尺壞民舍秦州雨水害稼宋州河決  
宋城縣衛州河決汲縣壞新塲堤八月梓州江漲壞閣  
道營舍九月澶州河漲鄆州清汶二水漲壞東陽縣民  
田復州沔陽縣湖晶漲壞民舍田稼五年五月潁州潁  
水溢壞堤及民舍徐州白溝河溢入州城七月復州江  
水漲毀民舍堤塘皆壞六年河中府河漲陷連堤溢入  
城壞軍營七所民舍百餘區鄜延寧州並三河水漲溢  
入州城鄜州壞軍營建武指揮使李海及老幼六十三

人溺死延州壞倉庫軍民廬舍千六百區寧州壞州城  
五百餘步諸軍營軍民舍五百二十區七年三月京兆  
府渭水漲壞浮梁溺死五十四人四月耀密博衛常潤  
諸州水害稼六月均州涓水均水漢江並漲壞民舍人  
畜死者甚衆又河決臨邑縣漢陽軍江水漲五丈七月  
大名府御河漲壞濟口南劍州江水漲壞居民舍一百  
四十餘區京兆府咸陽渭水漲壞浮梁工人溺死五十  
四人九月梧州江水漲三丈入城壞倉庫及民舍十月

河決懷州武陟縣害民田八年五月河大決滑州房村  
徑澶濮曹濟諸州浸民田壞居民廬舍東南流入淮六  
月陝州河漲壞浮梁又永定澗水漲壞民舍軍營千餘  
區河南府澍雨洛水漲五丈餘壞鞏縣官署軍營民舍  
殆盡穀洛伊瀍四水暴漲壞京城官署軍營寺觀祠廟  
民舍萬餘區溺死者以萬計又壞河清縣豐饒務倉庫  
軍營民舍百餘區雒州易水漲壞民廬舍邳州河水漲  
溢入城壞官寺民舍四百餘區荆門軍長林縣山水暴

張壞民舍五十一區溺死五六十人八月徐州清河漲丈七尺溢出塞州三百門以禦之九月宿州睢水漲汎民舍六十里是夏及秋開封浚儀酸棗陽武封邱長垣中牟尉氏襄邑雍邱等縣河水害民田九年七月嘉州江水暴漲壞官署民舍弱者千餘人八月延州南北兩河漲溢入東西兩城壞官寺民舍淄州霖雨孝婦河漲溢壞官寺民田孟州河漲壞浮梁損民田雅州江水漲九丈壞民廬舍新州江漲入南砦壞軍營雍熙二年七

月朗江溢害稼八月瀛莫州大水損民田三年六月壽  
州大水端拱元年二月博州水害民田五月英州江水  
漲五丈壞民田及廬舍數百區七月磁州漳滏二水漲  
淳化元年六月吉州大雨江漲漂壞民田廬舍黃梅縣  
堀口湖水漲壞民田廬舍皆盡江水漲二丈八尺洪州  
漲壞州城三十堵民廬舍二千餘區漂二千餘戶孟州  
河漲二年四月京北府河漲陝州河漲壞大堤及五龍  
祠六月乙酉溢於浚儀縣壞連堤浸民田上親臨視督



衛士塞之辛卯又決於宋城縣博州大霖雨河漲壞民廬舍八百七十區亳州河溢東流汎民田廬舍七月齊州明水漲壞黎濟砦城百餘堵許州沙河溢雒州塘水溢害民田殆盡嘉州江漲溢入州城毀民舍復州蜀漢二江水漲壞民田廬舍泗州招信縣大雨山河漲漂浸民田廬舍死者二十一人八月藤州江水漲十餘丈入州城壞官署民田九月卬州蒲江等縣山水暴漲壞民舍七十區死者七十九人是秋荆湖北路江水注溢浸

田畝甚衆三年七月河南府洛水漲壞七里鎮國二橋  
又山水暴漲壞豐饒務官舍民廬死者二百四十人十  
月上津縣大雨河水溢壞民舍溺者三十七人四年六  
月隴城縣大雨牛頭河漲二十丈沒溺居人廬舍九月  
澶州河漲衝陷北城壞居人廬舍官署倉庫殆盡民溺  
死者甚衆梓州玄武縣涪河漲二丈五尺壅下流入州  
城壞官私廬舍萬餘區溺死者甚衆十月澶州河決水  
西北流入御河浸大名府城知府趙昌言壅城門禦之

至道元年四月甲辰京師大雨雷電道上水數尺五月  
虔州江水漲二丈九尺壞城流入深八尺毀城門二年  
六月河南澶澗洛三水漲壞鎮國橋七月建州溪水漲  
溢入州城壞倉庫民舍萬餘區鄆州河漲壞連堤四處  
宋州汴河決穀熟縣閏七月陝州河漲是月廣南諸州  
並大雨水咸平元年七月侍禁閤門祇候王壽永使彭  
州回至鳳翔府境山水暴漲家屬八人溺死齊州清黃  
河泛溢壞田廬二年十月漳州山水泛溢壞民舍千餘

區民黃拏等十家溺死三年三月梓州江水漲壞民田  
五月河決鄆州王陵埽七月洋州漢水溢民有溺死者  
四年七月同州澇谷水溢夏陽縣溺死者數十人五年  
二月雄霸瀛莫深滄諸州乾寧軍水壞民田六月京師  
大雨漂壞廬舍民有壓死者積潦浸道路自朱雀門東  
抵宣化門尤甚皆注惠民河河復漲溢軍營景德元年  
九月宋州汴水決浸民田壞廬舍河決澶州橫隴埽二  
年六月寧州山水泛溢壞民舍軍營多溺死者三年七

月應天府汴水決南注亳州合浪宿渠東入於淮八月  
青州山水壞石橋四年六月鄭州索水漲高四丈許漂  
滎陽縣居民四十二戶有溺死者鄧州江水暴漲南劍  
州山水泛溢漂溺居人七月河溢澶州壞王八埽八月  
橫州江漲壞營舍大中祥符元年六月開封府尉民縣  
惠民河決二年七月徐濟青淄大水八月鳳州大水漂  
溺民居十月京畿惠民河決壞民田三年六月吉州臨  
江軍並江水泛溢害民田九月河決河中府白浮梁村

四年七月洪江筠袁州江漲害民田壞州城八月河決  
通利軍大名府御河溢合流壞府城害田人多溺死九  
月河溢於孟州溫縣蘇州吳江汎溢壞廬舍十一月楚  
秦州潮水害田人多溺者五年正月河決棣州聶家口  
七月慶州淮安鎮山秦漲漂溺居民六年六月保安軍  
積雨河溢浸城壘壞廬舍判官趙震溺死又兵民溺死  
凡六百五十人七年六月泗州水害民田河南府洛水  
漲秦州定西若有溺死者八月河決澶州十月濱州河

溢於定鎮八年七月坊州大雨河溢民有溺死者九年  
六月秦州獨孤谷水壞長道縣鹽官鎮城橋及官廨民  
舍二百九十五區溺死六十七人七月延州洎定平安  
塞門栲栳四砦山水泛溢壞堤城九月雄霸州界河泛  
溢利州水漂棧閣萬二千八百間天禧三年六月河決  
滑州城西南漂沒公私廬舍死者甚衆歷澶州濮鄆濟  
單至徐州與清河合浸城壁不沒者四板明年既塞六  
月復決於西北隅乾興元年正月秀州水災民多艱食

十月己酉夜滄州鹽山無棣二縣海潮溢壞公私廬舍溺死者甚衆是歲京東淮南路水災天聖初徐州仍歲水災三年十一月辛卯襄州漢水壞民田四年六月丁亥劍州邵武軍大水壞官私廬舍七千九百餘區溺死者百五十餘人是月河南府鄭州大水十月乙酉京山縣山水暴漲漂死者衆縣令唐用之溺焉是歲汴水溢決陳留堤又決京城西賈陂入護龍河以殺其勢五年三月襄頴許汝等州水七月辛丑秦州鹽官鎮大水民



多溺死六年七月壬子江寧府揚真潤三州江水溢壞  
官私廬舍是月雄霸州大水八月甲戌臨潼縣山水暴  
漲民溺死者甚衆是月河決楚王埽七年六月河北大  
水壞澶州浮梁明道元年四月壬子大名府冠氏等八  
縣水浸民田景祐元年閏六月甲子泗州淮汴溢七月  
澶州河決橫隴埽八月庚午洪州分寧縣山水暴發漂  
溺居民二百餘家死者三百七十餘口三年六月戊吉  
諸州久雨江溢壞城廬人多溺死四年六月乙亥杭州

大風雨江潮溢岸高六尺壞堤千餘丈八月甲戌越州  
大水漂溺居民寶元元年建州自正月雨至四月不止  
谿水大漲入州城壞民廬舍溺死者甚衆康定元年九  
月甲寅滑州大河泛溢壞民廬舍慶厯元年三月汴流  
不通八年六月乙亥河決澶州商胡埽是月恒雨七月  
癸丑衛州大雨水諸軍走避數日絕食是歲河北大水  
皇祐元年二月甲戌河北黃御二河決並注於乾寧軍  
河朔頻年水災二年鎮定復大水並邇尤被其害三年

七月辛酉河決館陶縣郭固口八月汴河絕流四年八月鄆州大水壞軍民廬舍嘉祐二年六月開封府界及京東西河北水潦害民田自五月大雨不止水冒安上門門關折壞官私廬舍數萬區域中繫棧渡人七月京東西荆湖北路水災淮水自夏秋暴漲環浸泗州城是歲諸路江河溢決河北尤甚民多流亡三年七月京索廣濟河溢浸民田五年七月蘇湖二州水災六年七月乙酉泗州淮水溢七年六月代州大雨山水暴入城七

月賓州山水壞城河決北京第五婦治平元年廢許蔡  
穎唐泗濠楚廬壽杭宣鄂洪施渝州光化軍水九月陳  
州水災二年八月庚寅大雨地上涌水壞官私廬舍漂  
人民畜產不可勝數是日御崇政殿宰相而下朝參者  
十數人而已詔開西華門以洩宮中積水水奔激殿侍  
班屋皆推没人畜多溺死官為葬祭其無主者千五百  
八十人熙寧元年秋霸州山水漲溢保定軍大水害稼  
壞官私廬舍城壁漂溺居民河決恩冀州漂溺居民二

年八月河決滄州饒安漂溺居民移縣治於張為村泉  
州大風雨水與潮相衝泛溢損田稼漂官私廬舍四年  
八月金州大水毀城壞官私廬舍七年六月熙州大雨  
洸河泛溢八年四月潭衡邵道諸州江水溢壞官私廬  
舍九年七月太原府汾河夏秋霖雨水大漲十月海陽  
潮陽二縣海潮溢壞廬舍溺居民十年七月河決曹村  
下埽澶淵絕流河南徙又東匯於梁山張澤澤凡壞郡  
縣四十五官亭民舍數萬田三十萬頃洺州漳河決注

城大雨水二丈河陽河水湍漲壞南倉弱居民滄衛霖  
雨不止河漑暴漲敗廬舍損田苗元豐元年章邱河水  
溢壞公私廬舍城壁漂弱民居舒州山水暴漲浸官私  
廬舍損田稼弱居民四年四月澶州臨河縣小吳河溢  
北流漂弱居民五月淮水泛漲五年秋陽武原武二縣  
河決壞田廬七年六月青田縣大水損田稼七月河北  
東西路水北京館陶水河溢入府城壞官私廬舍八月  
趙邢洛磁相諸州河水汎溢壞城郭軍營是年相州漳

河決溺臨漳縣居民懷州黃沁河泛溢大雨水損稼壞廬舍城壁磁州諸縣鎮夏秋漳滏河水泛溢臨漳縣斛律口決壞官私廬舍傷田稼損居民元祐四年夏秋霖雨河流泛漲八年自四月雨至八月晝夜不息畿內京東西淮南河北諸路大水詔開京師宮觀五日所在州令長吏祈禱宰臣呂大防等待罪紹聖元年七月京畿久雨曹濮陳蔡諸州水害稼元符元年河北京東等路大水二年六月久雨陝西京西河北大水河溢漂人民

壞廬舍是歲兩浙蘇湖秀等州尤罹水患大觀元年夏  
京畿大水詔工部都水監疏導至於八角鎮河北京西  
河溢漂溺民戶十月蘇湖水災二年秋黃河決陷沒邢  
州鉅鹿縣三年七月階州久雨江溢四年夏鄧州大水  
漂沒順陽縣政和五年六月江寧州太平宣州水災八  
月蘇湖常秀諸郡水災七年瀛滄州河決滄州城不沒  
者三版民死者百餘萬重和元年夏江淮荆浙諸路大  
水民流移溺者衆分遣使者振濟發運使任諒坐不奏



泗州壞官私廬舍等勒停宣和元年五月大雨水驟高  
十餘丈犯都城自西北牟駝岡連萬勝門外馬監居民  
盡沒前數日城中井皆渾宣和殿後井水溢蓋水信也  
至是詔都水使者決西城索河堤殺其勢城南居民冢  
墓俱被浸遂壞藉田親耕之稼水至溢猛直冒安上南  
薰門城守凡半月已而入汴汴渠將溢於是募人決下  
流由城北入五丈河下通梁山滌乃平十一月東南州  
縣水災四年十二月戊戌詔訪聞德州有京東西來流

民不少本州振濟有方令保奏推恩餘路遇有流移不  
即存恤按劾以聞六年秋京畿恒雨河北京東兩浙水  
災民多流移建炎二年春東南郡國水紹興二年閏月  
徽嚴州水害稼三年七月丙子泉州水三日壞城郭廬  
舍五年秋西川郡國水六年冬饒州雨水壞城四百餘  
丈十四年五月丙寅婺州水乙丑蘭溪縣水侵縣市丙  
寅中夜水暴至死者萬餘人十六年潼川府東南江溢  
水入城浸民廬十八年八月紹興府明婺州水二十二

年淮甸水二十三年金堂縣大水潼川府江溢浸城內  
外民廬宣州大水其流泛溢至太平州七月光澤縣大  
雨溪流暴湧平地高十餘丈人避不及者皆溺半時即  
平二十七年鎮江建康紹興府真太平池江洪鄂州漢  
陽軍大水二十八年六月丙申興利二州及大安軍大  
雨水流民廬壞橋棧死者甚衆九月江東淮南數郡水  
浙東西松江海郡縣大風雨平江紹興府湖常秀潤為  
甚二十九年七月戊戌福州水入城閩侯官懷安三縣

壞田廬官吏不以聞憲臣樊光遠坐黜三十年五月辛卯夜於潛臨安吉三縣山水暴出壞民廬田桑溺死者甚衆三十一年八月建始縣大水流民廬死者甚衆三十二年四月淮溢數百里漂民田廬死者尤衆六月浙西郡縣山涌暴雨漂民舍壞田覆舟隆興元年八月浙東西州縣大風水紹興平江府湖州及崇德縣為甚二年七月平江鎮江建康寧國府湖常秀池太平廬和光州江陰廣德壽春無為軍淮東郡皆大水浸城郭壞

廬舍圩田軍壘操舟行市者累日人溺死者衆越月積陰苦雨水患益甚淮東有流民乾道元年六月常湖州水壞圩田二年八月丁亥温州大風海溢漂民廬鹽塲龍朔寺覆舟溺死二萬餘人江濱骨骸尚七千餘三年六月廬舒蘄州水壞苗稼漂人畜七月己酉臨安府天目山湧暴水決臨安縣五鄉民廬二百八十餘家人多溺死八月湖秀州上虞縣水壞民田廬時積潦至於九月禾稼皆腐江東山水溢江西諸郡水隆興府四縣為

甚四年七月壬戌衢州大水敗城三百餘丈漂民廬孳  
牧壞禾稼諸暨縣大水害稼江寧建康府水是歲饒信  
亦水五年七月丁巳建寧府瑞應場大潦山棗等山暴  
水湧出漂民廬溺死甚衆是歲夏秋溫台州凡三大風  
水漂民廬壞田稼人畜溺死者甚衆黃巖縣為甚郡守  
王之望陳巖省不以聞皆黜削六年五月平江建康寧  
國府溫湖秀太平州廣德軍及江西郡大水江東城市  
有深丈餘者漂民廬湮田稼墮圩隄人多流徙八年五

月贛州南安軍山水暴出及隆興府吉筠州臨江軍皆  
大雨水漂民廬壞城郭潰田害稼六月壬寅四川郡縣  
大雨水嘉眉印蜀州永康軍及金堂縣尤甚漂民廬決  
田畝九年五月戊午建康隆興府嚴吉饒信池太平州  
廣德軍水漂民居壞圩湮田分水縣沙塞四百餘畝采  
石流民多渡江六月湖北郡縣水淳熙元年七月壬寅  
癸卯錢塘大風濤決臨安府江隄一千六百六十餘丈  
漂居民六百三十餘家仁和縣瀕江二鄉壞田圃三年

八月辛巳台州大風雨至於壬午海濤溪流合激為大水決江岸壞民廬溺死者甚衆癸未行都大雨水壞德勝江漲北新三橋及錢塘餘杭仁和縣田流入湖秀州害稼浙東西江東郡縣多水婺州會稽嵊廣德軍建平三縣尤甚四年五月庚子建寧府福南劍州大雨水至於壬寅漂民廬數千家己亥夜錢塘江濤大溢敗臨安府隄八十餘丈庚子又壞隄百餘丈明州瀕海大風海濤敗定海縣隄二千五百餘丈鄞縣隄五千一百餘丈



漂沒民田九月丁酉戊戌大風雨駕海濤敗錢塘縣隄  
三百餘丈餘姚縣溺死四十餘人敗隄二千五百六十  
餘丈敗上虞縣隄及梁湖堰及運河岸定海縣敗隄二  
千五百餘丈鄞縣敗隄五千一百餘丈五年六月戊辰  
古田縣大水漂民廬圮縣治市橋閏月己亥階州水壞  
城郭乙巳興化軍及福清縣及海口鎮大水漂民廬官  
舍倉庫溺死者甚衆六年夏衢州水秋寧國府温台湖  
秀太平州水壞圩田樂清縣溺死者百餘人七年五月

戊戌分宜縣大水決田害稼八年五月壬辰嚴州大水  
漂浸民居萬九千五百四十餘家壘舍六百八十餘區  
紹興府大水五縣漂浸民居八萬三千餘家田稼盡腐  
漁浦敗隄五百餘丈新林敗隄通運河是歲徽江二州  
亦水十年五月辛巳信州大水入城沈廬舍市井襄陽  
府大水漂民廬蓋藏為空江東浙東數郡亦水八月辛  
酉雷州大風激海濤沒瀕海民舍死者甚衆九月乙丑  
福潭州大風雨水暴至長溪寧德縣瀕溪聚落廬舍人

舟皆漂入海漳城半沒浸八百九十餘家丁卯吉州龍泉縣大水漂民廬壞田畝溺死者衆十一年四月和州水涇民廬壞圩田五月丙申階州白江水溢決隄圯城浸民廬壘舍祠廟寺觀甚多建康府太平州水六月甲申處州龍泉縣大雨水浸民舍壞杠梁匯田害稼七月壬辰明州大風雨山水暴出侵民市圯民廬覆舟殺人十二年六月婺州及富陽縣皆水浸民廬害田稼八月戊寅安吉縣暴水發棗園村漂廬舍寺觀壞田稼殆盡

溺死千餘人郡守劉藻不以聞坐黜是歲鄂州自夏徂冬水浸民廬九月台州水十四年三月辛未汀州水漂百餘家軍壘六十餘區十五年五月淮甸大雨水淮水溢廬濠楚州無為安豐高郵盱眙軍皆漂廬舍田稼廬州城圯荆江溢鄂州大水漂軍民壘舍三千餘江陵常德德安府復岳澧州漢陽軍水戊午祈門縣羣山暴匿為大水漂田禾廬舍冢墓桑麻人畜什六七浮皆甚眾餘害及浮梁縣六月建寧隆興府袁撫州臨江軍水圯

民廬七月黃巖縣水敗田瀦番易湖溢番易縣漂民舍  
田稼有流徙者十六年四月甲戌紹興府新昌縣山水  
暴作害稼湮田漂民廬五月丙辰沅靖州山水暴溢至  
辰州常德府城沒一丈五尺漂民廬舍汀州大水浸民  
廬千五百餘家溺死三千人分宜縣水丁巳階州白江  
水溢浸城市民廬六月庚寅鎮江府大雨水五日浸軍  
民壘舍三千餘辛卯潼川府東南二江溢決隄毀橋浸  
民廬涪城中江射洪通泉郪縣沒田廬紹熙二年三月

寧化縣連水溢廬舍田畝溺死二十餘人五月戊申建  
寧州水已酉福州水浸附郭民廬懷安侯官縣漂千三  
百餘家古田閩清縣亦壞田廬庚午利州東江溢壞隄  
田廬舍辛未潼川府東南江溢六月戊寅又溢再壞隄  
橋水入城沒廬舍七百四十餘家鄭涪射洪通泉縣匪  
田為江者千餘畝七月癸亥嘉陵江暴溢興州北城門  
郡獄官舍凡十七所漂民居三千四百九十餘潼川崇  
慶府絲果合金龍漢州懷安石泉大安軍魚關皆水時

上流西蕃界古松州江水暴溢龍州敗橋閣五百餘區  
江油縣溺死者衆三年五月壬辰常德府大雨水浸民  
田廬乙未潼川府東南江溢後六日又溢浸城外民廬  
人徙於山己亥池州大雨水連夕青陽縣山水暴湧漂  
田廬殺人蓋藏無遺貴池縣亦水庚子涇縣大雨水敗  
隄圯縣治廬舍六月辛丑建平縣水敗隄入城漂浸民  
廬甲戌祈門縣水七月壬申天台仙居縣大水連夕漂  
浸民居五百六十餘壞田傷稼襄陽江陵府大雨水漢

江溢敗隄防圯民廬沒田稼者逾旬復州荆門軍水亦如之鎮江府三縣水損下地之稼四年四月上高縣水浸二百餘家五月壬申癸酉奉新縣大雷雨水漂浸八百二十餘家五月辛未丙子鎮江府大雨水浸營壘六千餘區戊寅安豐軍大水平地三丈餘漂田廬絲麥皆空是月諸暨蕭山宣城寧國縣大水壞田稼廣德軍屬縣水害稼筠州水浸民廬戊寅進賢縣水圯百二十餘家六月丙申興國軍水池口鎮及大冶縣漂民廬有弱



死者戊戌靖安縣水漂三百二十餘家是江夏贛州江  
陵府亦水七月乙酉豐城縣水壬午臨江軍水皆圯民  
廬丁亥新淦縣漂浸二千三百餘家八月辛丑隆興府  
水圯千二百七十餘家吉州水漂浸民廬及泰和縣官  
舍自夏及秋江西九州三十七縣皆水是歲興化軍大  
風激海濤漂沒田廬尤多五年五月辛未石埭貴池涇  
縣皆水圯民廬弱者衆是月秦州大水七月壬申慈  
溪縣水漂民廬決田害稼人多溺死乙亥會稽山陰蕭

山餘姚上虞縣大風駕海濤壞隄傷田稼八月辛丑錢塘臨安新城富陽於潛縣大雨水餘杭縣尤甚漂沒田廬死者無筭安吉縣水平地丈餘平江鎮江寧國府明台溫嚴常州江陰軍皆水是秋武陵縣江溢圯田廬甚衆慶元元年六月壬申台州及屬縣大風雨山洪海濤並作漂沒田廬無筭死者蔽川沉沒旬日至千七月甲寅黃巖縣水尤甚常平使者莫漳以緩於振恤坐免七月臨安府水二年秋浙東郡國大水三年九月紹興府

屬縣二婺州屬縣二水害稼五年秋台溫衢婺水漂民  
廬人多溺死衢守張經以匿災愆振坐黜六年五月建  
寧府嚴衢婺饒信徽南劍州及江西郡縣皆大水自庚  
午至於甲戌漂民廬害稼嘉泰二年七月丙午上杭縣  
水圯田廬害稼民多溺死建安縣漂軍民廬舍百二十  
餘山摧覆民廬七十七家溺壓死者六十餘丁未長溪  
縣漂民廬二百八十餘家古田縣漂官舍民廬甚衆溺  
死者二百七十劍浦縣圯二百五十餘家死者亦衆三

年四月江南郡邑水害稼開禧元年九月丙戌漢淮水  
溢荆襄淮東郡國水楚州盱眙軍為甚圯民廬害稼三  
年五月庚寅東陽縣大水山千七百三十餘所同夕崩  
洪漂聚落五百四十餘所湮田二萬餘畝溺死者甚衆  
三年江浙淮郡邑水鄂州漢陽軍尤甚嘉定二年五月  
己亥連州大水敗城郭百餘丈沒官舍郡庠民廬壞田  
畝聚落甚多六月辛酉西和州水沒長道縣治倉庫丙  
子昭化縣水沒縣治漂民廬成州水入城圮壘舍同谷

縣及遂寧府閬州皆水七月壬辰台州大風雨激海濤  
漂圯二千二百八十餘家溺死尤衆三年四月甲子新  
城縣大水五月嚴衢婺徽州富陽餘杭鹽官新城諸暨  
淳安大雨水溺死者衆圯田廬市郭首種皆腐行都大  
水浸廬舍五千三百禁旅壘舍之在城外者半沒西湖  
溢四年七月辛酉慈溪縣大水圯田廬人多溺者八月  
山陰縣海敗堤漂民田數十里斥地十萬畝五年五月  
庚戌嚴州水六月丁丑台州及建德諸暨會稽縣水壞

田廬六年六月丁丑淳安縣山涌暴水陷清泉寺漂五鄉田廬百八十里溺死者無筭巨木皆拔丁亥於潛縣大水戊子諸暨縣風雷大雨山涌暴作漂十鄉田廬溺死者尤多錢塘縣臨安餘杭於潛安吉縣皆水九年五月行都及紹興府嚴衢婺台處信饒福漳泉州興化軍大水漂田廬害稼十年冬浙江濤溢地廬舍覆舟溺死甚衆蜀漢二州江沒城郭十一年六月戊申武康安吉縣大水漂官舍民廬壞田稼人畜死者甚衆十二年鹽

官縣海失故道潮汐衝平野二十餘里至是侵縣治廬  
舍港漬及上下管黃灣岡等鹽場皆圯蜀山淪入海中  
聚落田疇失其半壞四郡田後六年始平十四年建康  
府大水十五年七月蕭山縣大水時久雨衢婺徽嚴暴  
流與江濤合圯田廬害稼十六年五月江浙淮荆蜀郡  
縣水平江府湖常秀池鄂楚太平州廣德軍為甚漂民  
廬害稼圯城郭隄防溺死者衆鄂州江湖合漲城市沉  
沒累月不泄是秋江溢圯民廬餘杭錢塘仁和縣大水

福漳泉州興化軍水壞稼十五六十七年五月福建大水漂水口鎮民廬皆盡侯官縣甘蔗若漂數百家人多溺死建寧府沒平政橋入城南劍州北郡治城樓郡獄官舍城壞民避水樓上者皆死乙卯建昌軍大水城不沒者三板漂民廬圮官舍城郭橋梁害稼紹定二年天台仙居縣大水四年沿江水災端平三年三月辛酉蘄州大雨水漂民居是年英德府昭州及襄漢江皆大水嘉熙元年饒信州水二年浙江溢淳祐二年紹興府處



婺州水七年福建水十年嚴州水十一年八月甲辰汀  
州山水暴至漂人民九月江陵水是年江浙多水饒州  
亦水十二年六月建寧府嚴衢婺信台處南劍州邵武  
軍大水冒城郭漂室廬死者以萬數寶祐元年七月溫  
台處信饒州大水開慶元年五月己未婺州水漂民廬  
是歲滁嚴州水景定二年浙東水咸淳六年五月大雨  
水七年五月甲申諸暨縣大水漂廬舍是月重慶府江  
水泛溢者三漂城壁壞樓櫓十年三月廬州水四月紹

興府大雨水八月臨安府安吉武康縣水

太平興國四年八月滑州黎陽縣河清端拱元年二月  
澶濮二州河清二百餘里大中祥符三年十一月丁酉  
陝西河清十二月乙巳河再清當汾水合流處清如汾  
水元豐四年十月環州河水變甘大觀元年八月乾寧  
軍河清二年十二月陝州河清同州韓城縣郃陽縣至  
清及百里涉春不變自是迄政和宣和諸路數奏河清  
輒遣郎官致祭宰臣等率百官拜表賀歲以為常

大中祥符元年二月醴泉出蔡州汝陽鳳原鄉有疾者  
飲之皆愈八年十一月通州軍言醴泉出汶山下有疾  
者飲之皆愈熙寧元年五月京師開化坊醴泉出政和  
五年正月河陽臺觀醴泉出



宋史卷六十一

宋史卷六十一考證

五行志一水上然班固范曄志五行已推本之。臣名

南按蔚宗未嘗志五行也但修紀傳而已後志乃司

馬彪所續而劉昭補之此史文未檢處

泗洲淮溢。洲字係州字之訛即泗州也

七月黃巖縣水敗田瀦番易湖溢。臣名南按瀦字係

廬字之訛番易湖溢屬下句讀

同州韓城縣邠陽縣至清及百里。臣名南按邠陽當

作邵陽與韓城縣並在黃河西岸刊本因邵邵二字  
相近而訛也

宋史卷六十一考證

欽定四庫全書

史部

宋史卷六十二至五

詳校官編修臣邱庭滢

洗馬臣王坦修覆勘

覆校官編修臣沈清藻

校對官監丞臣侍朝

謄錄舉人臣曹錫齡

欽定四庫全書

宋史卷六十二

元中書右丞相總裁托克托等修

五行志第十五

五行一下

水下

建隆三年春延寧二州雪盈尺溝洫復冰草木不華丹  
州雪二尺太平興國七年三月宣州霜雪害桑稼雍熙  
五年冬南康軍大雨雪江水冰勝重載端拱元年閏五

月鄆州風雪傷麥淳化三年九月京兆府大雪害苗稼  
四年二月商州大雪民多凍死咸平四年三月丁丑京  
師及近畿諸州雪損桑天禧元年十一月京師大雪苦  
寒人多凍死路有僵尸遣中使埋之四郊二年正月永  
州大雪六晝夜方止江陵溪魚皆凍死慶歷三年十二  
月丁巳大雨雪皇祐四年十二月己丑雪初帝以愆元  
責躬減膳每見輔臣憂形於色龐籍等因言臣等不能  
燮理陰陽而上煩陛下責躬引咎願守散秩以避賢路



帝曰是朕誠不能感天而惠不能及民非卿等之過也是夕乃得雪至和元年正月京師大雪貧弱之民凍死者甚衆嘉祐元年正月甲寅朔御大慶殿受朝前一日殿庭設仗衛既具而大雨雪折宮架是日帝因感風眩促禮行而罷壬午大雨雪泥塗盡冰都民寒餓死者甚衆元祐二年冬京師大雪連月至春不止久陰恒寒罷上元節游幸降德音諸道八年十一月京師大雪多流民元符二年正月甲辰朔御大慶殿受朝賀以雪罷政

和三年十一月大雨雪連十餘日不止平地八尺餘冰  
滑人馬不能行詔百官乘轎入朝飛鳥多死七年十二  
月大雪詔收養內外乞丐老幼靖康元年閏十一月大  
雪盈三尺不止天地晦冥或雪未下時陰雲中有雪絲  
長數寸墮地二年正月丁酉大雪天寒甚地冰如鏡行  
者不能定立是月乙卯車駕在青城大雪數尺人多凍  
死建炎三年六月寒紹興元年二月寒食日雪五年二  
月乙巳雨雪六年二月癸卯雪十三年三月癸丑雨雪

十七年二月丙申雪十八年二月癸卯雪二十八年三月丙寅雨雪二十九年二月戊戌大雪三十一年正月戊子大雨雪至于己亥禁旅壘舍有壓者寒甚乾道元年二月大雪三月暴寒損苗稼二年春大雨寒至于三月損蠶麥二月丙申雪四年二月癸丑大雪五年二月戊子雪六年五月大風雨寒傷稼七年二月丙辰雨雪淳熙十二年淮水冰斷流是冬大雪自十二月至明年正月或雪或霰或雹或雨水冰涸尺餘連日不解台州

雪深丈餘凍死者甚衆十六年四月戊子天水縣大雨  
雪傷麥紹熙元年三月留寒至立夏不退十二月建寧  
府大雪深數尺查源洞寇張海起民避入山者多凍死  
二年正月行都大雪積沍河水厚尺餘寒甚是春雷雪  
相繼凍雨彌月四年二月己未雪慶元五年二月庚午  
雪六年二月乙酉雪五月亡暑氣凜如秋開禧三年二  
月戊申雪嘉定元年二月甲寅雪四年二月丙子雪六  
年二月丁亥雪六月亡暑夜寒九年二月乙酉丙申雪

十年二月庚申壬戌雪十七年三月癸丑雪寶慶元年  
四月辛卯雪紹定四年二月己巳雨雪六年三月壬子  
雨雪端平元年二月癸酉雨雪二年三月乙未雨雪嘉  
熙二年二月乙未雨雪淳祐六年二月壬申雨雪寶祐  
元年二月壬子雨雪二年三月戊子雨雪六年二月雨  
雪開慶元年二月庚辰雨雪景定五年二月辛亥雨雪  
建隆三年春厭次縣隕霜殺桑民不蠶淳化三年三月  
商州霜花皆死景德四年七月渭州瓦亭砦早霜傷稼

大中祥符九年十二月大名澶相州並霜害稼至和二  
年河東自春隕霜殺桑紹興七年二月庚申霜殺桑稼  
淳熙十六年七月階城鳳泗和州霜殺稼幾盡紹熙三  
年九月丁未和州隕霜連三日殺稼是月淮西郡國稼  
皆傷嘉熙元年三月霜

建隆元年十月臨清縣雨雹傷稼二年七月義川雲岩  
二縣大雨雹四年七月海州風雹乾德二年四月陽武  
縣雨雹宋州寧陵縣風雨雹傷民田六月潞州風雹七

月同州郃陽縣雨電害稼八月膚施縣風電霜害民田  
三年四月尉氏扶溝二縣風電害民田桑棗十損八九  
開寶二年風電害夏苗太平興國二年六月景城縣雨  
電七月永定縣大風電害稼五年四月冠氏安豐二縣  
風電七年五月蕪湖縣雨電傷稼八月五月相州風電  
害民田端拱元年三月霸州大雨電殺麥苗閏五月潤  
州雨電傷麥淳化元年六月許州大風電壞軍營民舍  
千一百五十六區魚臺縣風電害稼至道二年十一月

代州風電傷田稼咸平元年九月定州北平等縣風電  
傷稼三年四月丁巳京師雨電飛禽有隕者六年四月  
甲申京師暴雨電如彈丸大中祥符三年丙申京師雨  
電五年八月丙辰京師雨電天禧元年九月鎮戎軍彭  
城砦風電害民田八百餘畝天聖元年五月丙辰大雨  
電二年七月壬午大雨電六年京師雨電嘉祐四年四  
月丙戌震雷雨電熙寧元年秋鄜州雨電三年七月七  
年四月五月京師雨電八年夏鄜州涇州雨電九年二



月京師雨電十年夏鄜州雨電秦州大雨電紹聖二年  
十月辛未西南方有雷聲次大雨電四年閏二月癸卯  
京師雨電自辰至申建中靖國元年二月丙申京師雨  
電五年辛酉京師大雨電崇寧三年十月辛丑京師雨  
電大觀元年十月己巳三年五月戊申京師大雨電政  
和七年六月京師大雨電皆如拳或如一升器幾兩時  
而止宣和四年二月癸卯京師雨電四年三月朔雨電  
靖康元年十二月己卯庚辰京師雨電建炎三年八月

甲戌大雨電紹興元年二月壬辰高宗在越州雨電震  
雷二年二月丙子臨安府大雨電三年正月雨電震雷  
四年三月己未大雨電傷稼五年閏月乙巳朔雨電而  
雪十月丁未夜秀州華亭縣大風電雨電大如荔枝實  
壞舟覆屋十二月戊辰雨電七年二月癸丑雨電先一  
夕雷後一日雪癸丑又電八年六月丙辰大雨電九年  
二月甲戌雨電傷麥十二月辛未雨電十年二月辛亥  
大雨電十二月庚辰雨電十一年正月辛酉雨電十三

年二月甲子雨電傷麥五月戊午夜電七月庚午壬申  
電害稼十一月己未雨電十七年正月庚辰雨電五月  
丙寅又電二十一年三月己卯電傷禾麥二十八年四  
月辛亥雨電二十九年二月戊戌電損麥隆興元年三  
月丙申夜雨電二年三月丁丑電與霰俱四月庚午電  
六月雨電七月丁未雨電十月辛卯雨電十二月己亥  
雨雪而電閏月雨電乾道元年二月庚寅夜電二年十  
月辛卯雨電二年二月壬午雪癸未電四年正月癸未

夜電有霰二月丁酉癸丑雨電乙卯電而雪五年二月  
丙午電損麥六年二月壬午亦如之八年七月壬辰雨  
電淳熙三年四月丁亥雨電癸巳天台臨海二縣大風  
電傷麥四年正月建康府雨電五月丙寅雨電五年建  
康府雨電者再六年正月丁丑電傷麥三月壬申夜大  
雨電八年十二月甲寅雨電十二年二月辛酉夜雨電  
十三年閏月丙午雨電十五年二月丁亥雨雪而電六  
月丁卯雨電十六年二月己卯電而雨紹熙元年二月

丙申雪丁酉電二年正月戊寅大雨電震雷電以雨至  
二月庚辰大雪連數日是月庚寅朔建寧府大風雨電  
仆屋殺人三月癸酉大風雨電大如桃李實平地盈尺  
壞廬舍五千餘家禾麻蔬果皆損瑞安縣亦如之壞屋  
殺人尤甚秋祐川縣大風電壞粟麥慶元三年二月戊  
辰雪己巳電四月乙丑雨電大如栝破瓦殺燕爵嘉泰  
元年三月丙寅雨電三日五月丁丑雨電七月癸亥大  
雨而電二年四月庚寅雨電傷稼六月庚子大風電而

寒四年正月壬辰雪而雹開禧二年正月己酉雹而雷  
嘉定元年閏月壬申雨雹害稼二年三月乙未雨雹六  
年夏江浙郡縣多雨雹害稼十五年九月癸丑大震雨  
雹十六年秋雨雹紹定元年五月丁酉雨雹五年九月  
壬寅雨雹六年三月丙辰大雨雹端平二年五月乙未  
雹三年六月庚戌雨雹嘉熙元年二月壬辰雨雹淳祐  
二年四月壬申雨雹八年二月壬辰雨雹三月乙丑雨  
雹九年正月雨雹寶祐三年五月嘉定府大雨雹開慶

元年五月辛亥雨電景定元年二月庚申雨電

建隆四年四月癸巳宿州晝日無雨雷霆暴作軍校傅  
韜震死是夜夜半雷起於京師開封縣署役夫劉延嗣  
萬進震死頃之復蘇有烟燄自牖入室因駭仆徧體焦  
灼乾德二年正月辛巳雷霆京師西南東行有電五月  
戊寅大名府大雨雷震焚藁聚四年七月海州雷震長  
吏廳傷刺史梁彥超開寶七年六月易州雷震死耀武  
軍士八人八年八月邛州延貴鎮震死民費貴及其子

四人太平興國二年七月景城縣震死牛商馮異端拱  
二年八月興化軍民劉政震死有文在胸曰大不孝淳  
化三年七月泗州大風雨震僧伽塔柱至道元年三月  
甲戌雷未發聲召司天監寺趙昭問之答云按占書雷  
不發聲寬政之應也七月泗州大風雨雷震僧伽塔及  
壞鐘樓咸平元年正月戊寅京師西北有雷電十一月  
瀛州順安軍並東北有雷三年冬黃州西北雷震似盛  
夏時十二月真定府東南雷四年十月乙巳京師西南



雷電閏十二月大名府雷六年十一月甲午京師暴雷  
震司天言國家發號布德未及黎庶時議改元肆赦詔  
宰相增廣條目采民病悲除之景德三年九月丙寅夕  
京師大震雷大中祥符元年正月癸未京師西北方雷  
五年十二月己巳京師西北雷電九年五月殿中張信  
奉南海祝版乘驛至唐州震死嘉祐四年四月丙戌大  
震雷雨電慶歷六年五月雷電地震紹聖三年十月十  
五日西南方有雷聲次雨電大觀三年十月戊子大雷

電而雨建炎四年正月己未雷時御舟次溫州章安鎮  
高宗謂宰臣曰雷聲甚厲前史以為君弱臣強四夷兵  
不制是夕金人破明州壬戌又雷紹興五年九月戊寅  
雷十月丁巳雷六年十月丙午雷九年九月甲午十月  
丁卯雷十一年十一月己酉雷十五年十月辛卯十二  
月甲寅雷十六年溫州大雷電震死六人於龍翔寺十  
八年閏月甲戌雷十九年十月甲寅雷三十一年二月  
辛未南安軍大雷電大庾縣震死四人十一月辛未夜

震雷十二月癸酉雷二十二年十二月戊寅巳卯雷二  
十六年十二月甲子雷二十七年九月癸未雷三十一  
年正月丁丑雷乾道三年十一月丙寅雷雨不克郊戊  
辰日南至大震雷八年九月乙酉雷九年閏月癸卯雷  
淳熙九年九月壬午雷十二年十一月戊子雷十二年  
丁丑雷十三年正月己丑雷後三十五日雪十四年十  
一月乙卯雷十六年七月乙丑大雷震太室齋殿東鵠  
吻紹熙元年九月辛酉雷十一月壬午日南至郊祀風

雨大至帝震恐因致疾四年十一月己卯日南至辛巳  
雷五年十月癸巳大雷電慶元二年正月戊子雷十一  
月雷三年十月癸亥雷六年九月己未雷嘉泰二年正  
月己巳雷三年正月雷四年正月辛卯雷開禧二年正  
月雪雷九月雷三年十月辛未癸酉雷嘉定二年九月  
戊子雷三年正月雷十月壬申雷八月辛丑九月辛酉  
雷四年九月雷五年七月戊辰雷雨震太室之鷓鴣十  
月丁酉雷六年閏月壬辰雷震電乙未昧爽游雷七年

九月癸亥雷八年九月丙寅雷十一年九月辛巳祀明  
堂肆赦震雷十四年十月庚午雷十五年九月癸丑雷  
十六年九月乙卯十二月壬辰雷十七年九月丁亥雷  
寶慶二年九月庚申十月辛丑雷紹定二年九月庚辰  
雷五年九月壬寅雷端平二年十二月辛亥雷三年九  
月庚午雷是月祀明堂大雨震電十月戊戌雷嘉熙元  
年九月丁巳雷二年九月己酉十月庚戌雷淳祐元年  
十二月丙寅雷二年九月己丑雷三年三月丙辰雷十

年十一月壬午雷十二年十二月丁丑雷寶祐三年九月雷開慶元年十月乙酉雷景定二年十月戊戌雷電已亥雷電咸淳四年閏月丁巳九月庚申雷九年十月癸亥十二月丙辰壬戌雷建炎七年五月汴京無雲而雷紹興三十年十月壬戌晝漏半無雲而雷癸亥日過中無雲而雷淳熙十四年六月甲申昧爽禱雨太乙宮乘輿未駕有大聲自內發及和寧門人馬辟易相踐有失中屨者

至道元年十二月廣州大魚擊海水而出魚死長六丈三尺高丈餘政和七年雨中有二魚落殿中省廳屋上宣和二年三月內出魚純赤色蔡京等乞付史館拜表賀紹興十八年漳浦縣崇照鹽場海岸連有巨魚高數丈割其肉數百車剝目乃覺轉鬣而傍艦皆覆又漁人獲魚長二丈餘重數千斤剖之腹藏人骷髏髮如生二十四年四月海鹽縣海洋有巨鰐群鰐從之聲若謳歌抵岸偃沙上猶揚鬣揆刺其高齊縣門乾道六年行都

北關有鮎魚色黑腹下出人手於兩傍各具五指七年十一月丁亥洞庭湖巨黿走沙攤舟身廣長皆丈餘升舟以首足壓重艦沒水淳熙十三年二月庚申錢塘龍山江岸有大魚如象隨潮汐復逝十六年六月甲辰錢塘旁江居民得魚備五色鯽首鯉身民詭言夢得魚覺而手猶躍事聞有司令縱之慶元三年二月饒州景德鎮漁人得魚頰尾鯉鱗而首異常魚鎮之老人言其不祥紹興二年嘗出後為水災蓋是歲五月鎮果大水



皆魚孽也嘉定十七年海壞畿縣鹽官地數十里先是  
有巨魚橫海岸民鬻食之海患共六年而平

建隆元年七月澶州蝗二年五月范縣蝗三年七月深  
州蝻蟲生四年六月澶濮曹絳等州有蝗七月懷州蝗  
生乾德二年四月相州蝻蟲食桑五月昭慶縣有蝗東  
西四十里南北二十里是時河北河南陝西諸州有蝗  
三年七月諸路有蝗開寶二年八月冀磁二州蝗太平  
興國二年閏七月衛州蝻蟲生六年七月河南府宋州

蝗七年四月北陽縣蝻蟲生有飛鳥食之盡滑州蝻蟲  
生是月大名府陝州陳州蝗七月陽穀縣蝻蟲生雍熙  
三年七月鄆城縣有蛾蝗自死淳化元年七月淄澶濮  
州乾寧軍有蝗滄州蝗蝻蟲食苗棣州飛蝗自北來害  
稼三年六月甲申京師有蝗起東北趣至西南蔽空如  
雲翳日七月真許滄沂蔡汝商兗單等州淮陽軍平定  
彭城軍蝗蛾抱草自死至道二年六月亳州宿密州蝗  
生食苗七月長葛陽翟二縣有蝻蟲食苗歷城長清等

縣有蝗三年七月單州蝻蟲生景德二年六月京東諸  
州蝻蟲生三年八月德博蠃生四年九月宛邱東阿須  
城三縣蝗大中祥符二年五月雄州蝻蟲食苗三年六  
月開封府尉氏縣蝻蟲生四年六月祥符縣蝗七月河  
南府及京東蝗生食苗葉八月開封府祥符咸平中牟  
陳留雍邱封邱六縣蝗九年六月京畿京東西河北路  
蝗蝻繼生彌覆郊野食民田殆盡入公私廬舍七月辛  
亥過京師群飛翳空延至江淮南趣河東及霜寒始斃

天禧元年二月開封府京東西河北河東陝西兩浙荆湖百三十州軍蝗蝻復生多去歲螫者和州蝗生卵如稻粒而細六月江淮大風多吹蝗入江海或抱草木僵死二年四月江陰軍蝻蟲生天聖五年七月丙午邢洺州蝗甲寅趙州蝗十一月丁酉朔京兆府旱蝗六年五月乙卯河北京東蝗景祐元年六月開封府淄州蝗諸路募民掘蝗種萬餘石寶元二年六月癸酉曹濮單三州蝗四年淮南旱蝗是歲京師飛蝗蔽天皇祐五年建

康府蝗熙寧元年秀州蝗五年河北大蝗六年四月河北諸路蝗是歲江寧府飛蝗自江北來七年夏開封府界及河北路蝗七月咸平縣鸚鵡食蝗八年八月淮西蝗陳潁州蔽野九年夏開封府畿京東河北陝西蝗元豐四年六月河北蝗秋開封府界蝗五年夏又蝗六年夏又蝗五月沂州蝗元符元年八月高郵軍蝗抱草死崇寧元年夏開封府界京東河北淮南等路蝗二年諸路蝗令有司酺祭三年四年連歲大蝗其飛蔽日來自

山東及府界河北尤甚宣和三年諸路蝗五年蝗建炎  
二年六月京師淮甸大蝗八月庚午令長吏脩醮祭紹  
興二十九年七月盱眙軍楚州軍界三十里蝗為風所  
墮風止復飛還淮北三十二年六月江東淮南北郡縣  
蝗飛入湖州境聲如風雨自癸巳至於七月丙申徧于  
畿縣餘杭仁和錢塘皆蝗丙午蝗入京城八月山東大  
蝗癸丑頒祭醮禮式隆興元年七月大蝗八月壬申癸  
酉飛蝗過都蔽天日徽宣湖三州及浙東郡縣害稼京

東大蝗襄隨尤甚民為乏食二年夏餘杭縣蝗乾道元  
年六月淮西蝗憲臣姚岳貢死蝗為瑞以佞坐黜淳熙  
三年八月淮北飛蝗入楚州盱眙軍界如風雷者逾時  
遇大雨皆死稼用不害九年六月全椒歷陽烏江縣蝗  
乙卯飛蝗過都遇大雨墮仁和縣界七月淮甸大蝗真  
揚泰州害撲蝗五千斛餘郡或日捕數十車群飛絕江  
墮鎮江府皆害稼十年六月蝗遺種于淮浙害稼十四  
年七月仁和縣蝗紹熙二年七月高郵縣蝗至於泰州

五年八月楚和州蝗嘉定二年浙西諸縣大蝗自丹陽  
入武進若煙霧蔽天其墮亘十餘里常之三縣捕八千  
餘石湖之長興捕數百石時浙東近郡亦蝗開禧三年  
夏秋久旱大蝗群飛蔽天浙西豆粟皆既于蝗嘉定元  
年五月浙江大蝗六月乙酉有事於園立方澤且祭酺  
七月又酺頒酺式於郡縣二年四月又蝗五月丁酉令  
諸郡修酺祀六月辛未飛蝗入畿縣三年臨安府蝗七  
年六月浙郡蝗八年四月飛蝗越淮而南江淮郡蝗食



禾苗山林草木皆盡乙卯飛蝗入畿縣己亥祭酺令郡  
有蝗者如式以祭自夏徂秋諸道捕蝗者以千百石計  
饑民競捕官出粟易之九年五月浙東蝗丁巳令郡國  
酺祭是歲薦饑官以粟易蝗者千百斛十年四月楚州  
蝗紹定三年福建蝗端平元年五月當塗縣蝗嘉熙四  
年建康府蝗淳祐二年五月兩淮蝗景定三年八月兩  
浙蝗

紹興十年春有野豕入海州市民刺殺之時州已陷夏

鎮江軍帥王勝攻取之明年以其郡屬金悉空其民乾道六年南雄州民家豕生數豚首各具他獸形有類人者慶元初樂平縣民家豕生豚與南雄同而更具他獸蹄三年四月餘干縣民家豕生八豚其二為鹿古田縣豕食嬰兒淳化三年六月黑風晝晦景祐四年七月黑氣長丈餘出畢宿下康定元年黑風晝晦元豐末嘗有物大如席夜見寢殿上而神宗崩元符末又數見而哲宗崩至大觀間漸晝見政和元年以後大作每得人語

聲則出先若列屋推倒之聲其形厘丈餘髣髴如龜金  
眼行動硜硜有聲黑氣蒙之下人了了氣之所及腥血  
四灑兵刃皆不能施又或變人形亦或為驢自春歷夏  
晝夜出無時遇冬則罕見多在掖庭宮人所居之地亦  
嘗及內殿後習以為常人亦不大怖宣和末寢少而亂  
遂作政和三年夏至宰臣何執中奉祀北郊有黑氣長  
數丈出自齋宮行一里許入壇壝繞祭所皆近人穿燈  
燭而過俄又及於壇禮將畢不見宣和中洛陽府畿間

忽有物如人或蹲踞如犬其色正黑不辨眉目始夜則掠小兒食之後雖白晝入人家為患所至喧然不安謂之黑漢有力者夜執槍棒自衛亦有託以作過者如此二歲乃息已而北征事起卒成金人之禍三年春日有青忽青黑無光其中洶洶而動若鈺金而湧沸狀日旁有黑氣如水波周迴旋繞將暮而稍止建炎三年二月甲寅日初出兩黑氣如人形夾日旁至巳時乃散乾道四年春舒州雨黑米堅如鐵破之米心通黑淳熙十一

年二月臨安府新城縣深浦天雨黑水終夕十六年六月行都錢塘門啓黑風入揚沙石慶元元年徽州黃山民家古井風雨夜出黑氣波浪噴湧

咸平元年五月撫州王羲之墨池水色變黑如雲大中祥符元年五月丁丑泰山王母池水變紅紫色四年二月己未河中府寶鼎縣漢泉有光如燭焰四五炬其聲如雷三年八月解州鹽池紫泉場也次二年里許不種自生其味特嘉命屯田員外郎何敏中往祭池廟八月

東池水自成鹽僅半池潔白成塊晶瑩異常祀汾陰經  
度制置使陳堯叟繼獻凡四千七百斤分錫近臣及諸  
列校紹興十四年樂平縣河衝里田隴數十百頃田中  
水類為物所吸聚為一直行高平地數尺不假隄防而  
水自行里南程氏家井水溢亦高數尺天矯如長虹聲  
如雷穿牆毀樓二水鬪于杉墩且前且卻約十刻乃解  
各復故

天聖四年十月甲午昏霧四塞靖康元年正月丁未霧

氣四塞對面不見建炎二年十一月甲子北京大霧四塞是夕城陷三年三月車駕發温州航海乙丑次松門海中白霧晝晦六月久陰四年三月乙丑四方霧下如塵紹興三年自正月陰晦陽光不舒者四十餘日五年正月甲申霧氣昏塞七月劉豫毀明堂天地晦冥者累日七年氛氣翳日八年三月甲寅晝晦日無光陰霧四塞乙卯晝夜雲氣昧濁四月積雨方止氛霧四塞晝日無光隆興元年五月丙午朔霧四塞二年六月積陰彌

月乾道二年十一月久陰五年正月甲申晝蒙六年五月連陰六月日青無光淳熙六年十二月乙丑晝蒙十三年正月丁亥亦如之慶元二年二月己卯晝暝四方昏塞三年二月丁卯晝晦昏霧四塞六年十一月辛卯嘉定三年正月丙午十年正月乙未十三年三月壬辰皆晝蒙

建炎四年三月辛亥白虹貫日紹興八年三月辛巳白虹亘天二十七年二月壬寅白虹貫日三十年十二月



辛酉曲虹見日之西乾道三年十月丙申虹見淳熙元  
年十月戊寅白虹見日東二年十月庚辰虹見五年十  
月丁巳曲虹見日東慶元元年正月丙辰白虹貫日嘉  
泰三年七月壬午亦如之四年十一月虹見嘉定十一  
年二月丙辰白虹貫日嘉熙三年十月乙丑虹見四年  
二月辛丑白虹貫日淳祐十年十二月丁巳虹見寶祐  
五年十月虹見

太祖從周世宗征淮南戰于江亭有龍自水中向太祖

奮躍乾德五年夏京師雨有黑龍見尾於雲際自西北趨東南占主大水明年州府二十四水壞田廬開寶六年四月單父縣民王美家龍起井中暴雨飄廬舍失族屬及壞舊鎮廨舍三百五十餘區大木皆折七年六月棣州有火自空墮于城北門樓有物抱東柱龍形金色足三尺許其氣甚腥旦視之壁上有煙痕爪跡三十六大中祥符二年八月青蛇出無爲軍廨長數尺宣和元年夏雨晝夜凡數日及霽開封縣前茶肆中有異物如

犬大蹲踞卧榻下細視之身僅六七尺色蒼黑其首類  
驢兩頰作魚額而色正綠頂有角生極長于其際始分  
兩歧聲如牛鳴與世所繪龍無異茶肆近軍器作坊兵  
卒來觀共殺食之已而京師大水訛言龍復讐云紹興  
初朱勝非出守江州過梁山龍入其舟纜長數寸赤背  
綠腹白尾黑爪甲目有光近龍孽也行都柴塚橋旌忠  
廟三蛇出没庭廡大者盈尺方鱗金色首脊有金錢遇  
霽或變化數百於蕉卉間廟徙而蛇孽亦絕十一年四

月衡山縣淨居巖有蛇長二丈身圍數尺黑色而方文  
震死山水大至先是山氣遇夜輒昏昧蛇斃始明二十  
五年六月湖口縣赤龍橫水中如山寒風怒濤覆舟數  
十艘士卒溺者數十人三十年春宜黃縣大蛇見於丞  
治長二丈捕之縱數里外俄復至者數四乾道五年七  
月乙亥武寧縣龍鬪于復塘村大雷雨二龍奔逃珠墜  
大如車輪牧童得之自是連歲有水災

大平興國三年靈州獻官馬駒足有二距雍熙二年度

州吏李祚家馬生駒足有距四年鄜州直羅縣民高英家馬生前兩足如牛端拱二年夏州民程真家馬生二駒大中祥符九年十二月大名監馬生駒赤色肉尾無鬣宣和五年馬生兩角長三寸四足皆生距時北方正用兵紹興八年廣西海墾有海獸如馬蹄鬣皆丹夜入民舍聚衆殺之明日海溢環村百餘家皆溺死近馬禍也五年廣西市馬全綱疫死淳熙六年十二月宕昌西馬金州馬皆大疫十二年黎雅州獻馬有角長二寸京

房易傳曰臣易上政不順厥妖馬角茲謂賢士不足紹興元年二月丙申右丞相留正乘馬早朝入禁扉馬斃近馬禍也嘉定五年正月史彌遠入賀于東宮馬驚墮地衣幘皆敗其額微損事與上同

建隆元年雄州歸義軍民劉進妻產三男二年孟州民孟福定州民孟公禮等妻各產三男三年齊州晉州大旱民家多生魃龍岡縣民林嗣妻京師龍捷軍卒宜超妻產三男乾德三年江陵府民劉暉妻產三男四年安

州驍健軍卒趙遠妻產三男五年光州民高與德州民  
趙嗣乾寧軍卒王進妻產三男開寶元年沂州民王政  
澶州民謝興妻產三男二年閬州民孫延廣開州民董  
遠妻產三男七年青城縣王宥妻產三男河南府民劉  
元妻產三男太平興國二年邢州招收軍卒李遇汝州  
歸化軍卒魚霸常州民謝祚妻產三男晉原縣民楊萬  
妻產三男七年澶州龍衛軍卒靳興晉州民鄭彥福妻  
產三男汾州民鄭訓妻產三女鴈門縣民劉習妻產四

男滑州歸化軍卒安旺妻產二男一女八年楊州順化  
軍卒俞釗溫州民李遇榮州民李祚妻產三男九年揚  
子縣民妻生男毛被體半寸餘面長頂高烏眉眉毛麤  
密近髮際有毛兩道軟長眉紫唇紅耳厚鼻大類西域  
僧至三歲畫圖以獻雍熙二年奉新縣民何靖妻產三  
男三年魯山縣民張美相州林慮縣民張欽妻產三男  
四年晉原縣民周承暉固始縣民楊昇妻產三男端拱  
元年祁州民馮遇妻產三男二年齊州民徐美并州民



侯遠常州卒徐流妻產三男淳化元年正月河陽縣民  
王斌新息縣民李珪妻產三男八月汾州悉達院僧智  
嚴頭生角三寸二年晉陵縣民黃釗南充縣民彭公霸  
龍陽縣民周信王屋縣民李清臨清縣民國忠鄰水縣  
吏謝元昇奉化縣卒朱旺妻產三男瀛州民胡立邢州  
民高德妻產三男四年邯鄲縣民鄭安河間縣民王希  
輦安州民宋和妻產三男五年雍丘縣營卒盛泰妻產  
三男至道元年保州敵軍校李深宋城縣民王洽臨淮

縣民賀用永清縣民董美鄆城縣民馬方妻產三男二  
年安豐縣民王構伊陽縣民張壽成都縣民彭操妻產  
三男三年汾州民趙演沂州民李嗣南劍州民劉相饒  
安縣民睦鸞衛州宣武軍卒李筠妻產三男咸平元年  
台州永安縣王旺澶州靜戎軍卒鄭穗妻產三男莘縣  
民懷梁獲嘉縣民王貴永康縣民羅彥瑄溫縣民楊榮  
毗陵縣民魏吉妻產三男三年睢縣民朱進鄆州武威  
軍卒徐遼深州民彭遠妻產三男四年望都縣民郭瑩

邕州澄海軍卒梁濟妻產三男五年夏津縣民趙替妻  
產三男六年石城縣民劉詵堂邑縣民戴玉妻產三男  
平鄉縣民郭讓妻產四男景德元年南昌縣民李總妻  
產三男二年奉新縣民魏勇妻產三男四年八作司匠  
趙榮南頓縣民任登老棗強縣民張緒妻各產三男大  
中祥符元年高郵軍民王言妻產四男二年崞縣民張  
留清平軍民楊泉妻產三男三年獲嘉縣民馮可妻產  
三男宋城縣民李悔妻產二男一女四年河池縣民馮

守欽妻產三男七年大名府宣勇軍卒徐璘贊皇縣民  
李釗妻產三男七年銅鞮縣民李謙宋城縣民白德霍  
邱縣民朱璘平涼縣民焦思順妻產三男八年河南府  
民宋再興真陽縣民周元歷亭縣民田用侯言霍邱縣  
民王忠杜戩濛陽縣民衛志聰定州驍武軍卒張吉雍  
邱縣懷勇軍卒黃進妻產三男永嘉縣民張保妻產四  
男九年曹州雄勇軍卒聶德瀛州民劉元澧州民張貴  
廣州民劉吉妻產三男天禧元年連江縣民陳霸妻產

三男三年錢塘縣民謝文信遂安縣民李承遇妻產三男四年孝感縣民杜明平恩縣民劉順妻產三男七月未陽縣民張中妻產三男其額有白誌方寸餘上生白髮自天聖迄治平婦人生四男者二生三男者四十四生二男一女者一熙寧元年距元豐七年郟邑民家生三男者八十四而四男者一三男一女者一元豐八年至元符二年生三男者十八而四男者二三男一女者一元符三年至靖康生三男者十九而四男者一前志

以為人民蕃息之驗宣和六年都城有賣青果男子孕  
而生子蓐母不能收易七人始免而逃去豐樂樓酒保  
朱氏子之妻可四十餘楚州人忽生髭長僅六七寸疏  
秀而美宛然一男子特詔度為女道士紹興三年建康  
府桐林灣婦產子肉角有齒是歲人多產鱗毛二十年  
八月真符縣民家一產三男隆興元年建康民流寓行  
都而婦產子二首具羽毛之形乾道元年衡湘間人有  
化為虎者餘杭縣婦產子青而毛二肉角又有二家婦

產子亦如之皆連體兩面相鄉三家才相距一二里潮  
州城西婦孕過期產子如指大五體皆具者百餘蠕蠕  
能動淳熙十年番禺南鄉婦產子肘各有二臂及長鬪  
則六臂並運十三年行都有人死十有四日復生十一  
月辛未鄧家巷婦產肉塊三其一直目而橫口十四年  
六月臨安府浦頭婦產子生而能言四日暴長四尺紹  
熙元年三月癸酉行都市人夜以殺相驚奔迸者良久  
乃定是歲崑山縣工采石而山壓三年六月它工采石

鄰山聞其聲呼相應荅如平生其家鑿石出之見其妻  
喜曰久閉乍風肌膚如裂俄頃聲微噤不語化為石人  
貌如生慶元元年樂平縣民婦產子有尾永州民產子  
首有角腋有肉翅二年七月進賢縣婦產子亦如之而  
面有三目嘉定四年四月鎮江府後軍妻生子一身二  
首而四臂

淳化五年六月京師疫遣太醫和藥救之至道二年江  
南頻年多疾疫大觀三年江東疫建炎元年三月金人



圍汴京城中疫死者幾半紹興元年六月浙西大疫平  
江府以北流屍無算秋冬紹興府連年大疫官募人能  
服粥藥之勞者活及百人者度為僧三年二月永州疫  
六年四川疫十六年夏行都疫二十六年夏行都又疫  
高宗出柴胡製藥活者甚衆隆興二年冬淮甸流民二  
三十萬避亂江南結草舍徧山谷暴露凍餒疫死者半  
僅有還者亦死是歲浙之饑民疫者尤衆乾道元年行  
都及紹興府饑民大疫浙東西亦如之六年春民以冬

燠疫作八年夏行都民疫及秋未息江西饑民大疫隆興府民疫遭水患多死淳熙四年真州大疫八年行都大疫禁旅多死寧國府民疫死者尤衆十四年春都民禁旅大疫浙西郡國亦疫十六年潭州疫紹興二年春涪州疫死數千人三年資榮二州大疫慶元元年行都疫二年五月行都疫三年三月行都及淮浙郡縣疫嘉泰三年五月行都疫嘉定元年夏淮甸大疫官募掩骼及二百人者度為僧是歲浙民亦疫二年夏都民疫死

甚衆淮民流江南者饑與暑并多疫死三年四月都民多疫死四年二月亦如之十五年贛州疫十六年永道二州疫德祐元年六月庚子是日四城遷徙流民患疫而死者不可勝計天寧寺死者尤多二年閏三月數月間城中疫氣薰蒸人之病死者不可以數計

熙寧元年七月戊子夜西南雲間有聲鳴如風水相激寢周四方主民勞兵革歲動六年七月丙寅夜西北雲間有聲如磨物主百姓勞七年七月庚子夜西北天鳴

主驚憂之事紹興二十一年八月乙亥天有聲如雷水響於東南四日乃止開禧元年六月壬寅天鳴有聲

天禧三年正月晦沈邱縣民駱新田聞震頃之隕石入地七尺許淳熙十六年三月壬寅隕石於楚州寶應縣散如火甚臭腥慶元三年六月辛未黃巖縣大石自隕雷雨甚至山水漢湧

宋史卷六十二

宋史卷六十二考證

五行志一水下淳熙十六年七月階城鳳泗和州霜殺  
稼幾盡○按城當作成

七月同州邠陽縣雨雹害稼○邠陽當作郃陽

建炎七年五月汴京無雲而雷○臣召南按此文應提

行寫此序無雲而雷與前文叙震雷又異也

淳化三年六月黑風晝晦○臣召南按此文應提行寫

前文叙豕禍此文以下叙黑氣也

黑氣蒙之下人了了○臣召南按下人二字無義當是

不大二字之訛也言其形狀不甚分明

三年八月解州鹽池場也次○也次二字疑誤

宋史卷六十二考證

欽定四庫全書

宋史卷六十三

元中書右丞相總裁托克托等修

五行志第十六

五行二上

火上

炎上火之性也火失其性則為災昔舊說以恒燠草妖羽蟲之孽羊禍赤青赤祥之類皆屬之火今從之建隆元年宿州火燔民舍萬餘區二年三月內酒坊火燔舍

百八十區酒工死者三千餘三年正月滑州甲仗庫火  
燔儀門及軍資庫一百九十區兵器錢帛並盡開封府  
通許鎮民家火燔廬舍三百四十餘區二月安州牙吏  
施延業家火燔民舍并顯義軍營六百餘區五月京師  
相國寺火燔舍數百區海州火燔數百家死者十八人  
乾德四年二月岳州衙署廩庫火燔市肆民舍殆盡官  
吏踰城僅免三月陳州火燔民舍數十區潭州火燔民  
舍五百餘區踰月民周澤家火又燔倉廩民舍數百區



死者三十六人是春諸州言火者甚衆八月衡州火燔  
公署倉庫民舍一千餘區五年京師建隆觀火開寶三  
年八月辰州解火燔軍資庫五年七月忠州火倉庫殆  
盡七年九月永城縣火燔民舍一千八百餘區八年四  
月洋州火燔州解民舍千七百區永城縣火燔軍營民  
舍千九百八十區死者九人太平興國七年八月益州  
西倉災雍熙元年五月丁丑乾元文明二殿災初夕陰  
雲雷震火起月華門翌日辰巳方止二年九月庚寅夜

楚王元佐宮火燔舍數百區王自是以疾廢于家三年  
光化軍民卻勳家火延燔軍廨舍庫端拱元年二月雲  
安軍威棹營火二年三月衡州火燔州縣官舍倉庫軍  
營三百餘區又崇賢坊有烏燔數十處七日不滅淳化  
三年十月蔡州懷慶軍營火燔汝河橋民居官舍三千  
餘區死者數人十二月建安軍城西火燔民舍官廨等  
殆盡四年二月永州保安津舍火飛焰過江燒州門及  
民屋三百餘家咸平二年四月池州倉火燔米八萬七

千斛景德元年正月平虜軍營火焚民居廬舍甚衆四  
年十一月郢州火燔倉庫並盡大中祥符元年正月桂  
州甲仗庫災二年四月昇州火燔軍營民舍殆盡四年  
八月徐州草場火十月鎮州城樓戰棚火七月雄州甲  
仗庫火八年二月甲寅宗正寺火四月壬申夜榮王元  
儼宮火自三鼓北風甚癸酉亭午乃止延燔左承天祥  
符門內藏庫朝天殿乾元門崇文院秘閣天書法物內  
香藏庫九年五月甲子左天廡坊草場火天禧二年二

月戊寅北宅蔡州團練使德維火延燔數百區三年春  
京師多火六年永州軍營火延民舍數百餘區五年四  
月丁巳爭材場火天聖三年二月丁卯蘄州權貨務火  
五年四月壬辰壽寧觀火七年六月丁未玉清昭應宮  
災初大中祥符元年詔建宮以藏天書七年宮始成凡  
二千六百一十楹至是火發夜中大雷雨至曉而盡明  
道元年八月壬戌修文德殿成是夜禁中火延燔崇德  
長春滋福會慶崇徽天和承明八殿景祐三年七月庚

子太平興國寺火起閣中延燔開先殿及寺舍數百楹  
是夕大雨電十月己酉澶州橫龍水口西岸料物場火  
焚薪萬一百九十餘萬寶元二年六月丁丑益州火焚  
民廬舍二千餘區康定元年六月乙未南京鴻慶宮神  
御殿火慶歷元年五月癸亥慶州草場火延燔州城樓  
櫓三年十一月丙寅上清宮火四年三月丙戌夜代州  
五臺山寺火六月丁未開寶寺靈感塔災七月甲子燕  
王宮火六年七月辛丑洪福禪院火八年正月壬午江

寧府火初李景江南大建宮室府寺其制多倣帝室至  
是一夕而焚唯燭殿獨存皇祐五年正月丁巳會靈觀  
火至和元年四月辛丑祥元觀火二年并州太宗神御  
殿火嘉祐三年正月溫州火燔屋萬四千間死者五十  
人治平四年十二月壬子夜睦親宮火焚九百餘間甲  
寅廣親宮又火熙寧六年二月丙申永昌陵上宮火燔  
東城門七年九月壬子三司火自巳至戌焚屋千八百  
楹案牘殆盡十一月洞真宮火九年十月魯王濮王宮

火十年正月仙韶院火撤屋二百五十楹三月丙子開  
封府火元豐元年八月邕州火焚官舍千三百四十六  
區諸軍衣萬餘襲穀帛軍器百五十萬四年六月衡州  
火燒官舍民居七千二百楹欽州大雷震火焚城屋五  
年二月洞真宮火八年二月辛巳開寶寺火時寓禮部  
貢院於寺點校試卷官翟曼陳之方馬希孟焚死吏卒  
死者十四人元祐元年三月宗室宮院火六年十二月  
開封府火紹聖三年三月七日內尚書省火尋撲滅上

諭執政禁中屢火方醮禳已罷看宴仍不御垂拱殿三日四年七月甲子禁中火元符元年四月宗室宮院火建中靖國元年六月壬寅集禧觀火大雨中久而後滅崇寧二年六月中太乙宮火三年三月辛丑大內火政和三年四月蘇州火延燒公私屋一百七十餘間五月封州火延燒公私屋六百八十二間五月辛丑京師大盈倉火是歲成都府大慈寺溫州絳州皆火重和元年九月掖庭大火自甲夜達曉大雨如傾火益熾凡蕪五



千餘間後苑廣聖宮及宮人所居幾盡焚死者甚衆靖  
康元年十二月丙子夜尚書省火延燒禮祠工刑吏部  
折尚書省牌擲火中禳之乃息二年三月戊戌天漢橋  
火焚百餘家頃之都亭驛又火巳酉康門火紹興元年  
十月乙酉臨安府越州大火民多露處十二月辛未越  
州火焚吏部文書乙酉移蹕錢塘二年正月丁巳宣州  
火燔民居幾半五月庚辰臨安府大火亘六七里燔萬  
數千家十二月甲午行都大火燔吏刑工部御史臺官

府民居軍壘盡乙未旦乃熄三年九月庚申行都闕門  
外火多燔民居四年正月戊寅行都火燔數千家六年  
二月行都屢火燔千餘家十二月行都大火燔萬餘家  
人有死者時高宗親征劉豫都民之暴露者多凍死七  
年正月辛未平江府火二月辛丑鎮江府楚真揚太平  
州火是歲臨安府火八年二月丁酉太平府大火宣撫  
司及官舍民居帑藏文書皆盡死者甚衆錄事參軍呂  
應中當塗縣丞李致虛死焉九年二月己卯行都火七

月壬寅又火十年十月行都火燔民居延及省部十一月丁巳温州大火燔州學酤征舶等務永嘉縣治及民居千餘十一年七月癸亥婺州大火燔州獄倉場寺觀暨民居幾半九月甲寅建康府火燔府治三十餘區民居三千餘家十二年二月辛巳鎮江府火燔倉米數萬石島六萬束民居尤衆是月太平池州及蕪湖縣皆火三月丙申行都火四月行都又火十四年正月甲子行都火十五年大寧監火燔官舍帑藏文書九月丙子行

都火經夕漸近太室而滅十七年八月建康府火十二月辛亥靜江府火燔民舍甚衆二十年正月壬午行都火燔吏部文書皆盡二十五年汴京宮室悉焚二十六年潭州南嶽廟火二十九年四月鎮江府火焚軍壘民居十二月丙子夔州大火燔官舍民居寺觀人有死者乾道元年正月秦州火燔民舍幾盡是年春德安府應城縣廐驛火二年冬真州六合縣武鋒軍壘火十二月婺州火自是火患不息人火之也三年五月泉州火五

年十二月壬申太室東北垣外民舍火七年十一月丁亥禁垣外闔人私舍火延及民居九年九月台州火經夕至於翌日晝漏半燔州獄縣治酒務及居民七十餘家淳熙元年十二月丁巳泉州火燔城樓及五十餘家二年六月戊午潭州南嶽廟火八月嚴州火十一月癸亥麗正門內東廡災是歲瀘州火坐上焚民居不實守臣貶秩三年九月大內射殿災延及東宮門四年十一月辛酉鄂州南市火暴風通夕燔千餘家五年四月庚

寅興州沙市火燔三百四十餘家有死者十一月和州  
牧營火燔一百六十區七年二月江陵府沙市大火燔  
數千家延及船艦死者甚衆八月温州試士火作於貢  
闈八年正月揚州火九月乙亥行都火九年九月合州  
大火燔民居幾盡官舍僅有存者十一年二月辛酉興  
元府義勝軍壘舍火十二年八月温州火燔城樓及四  
百餘家十月鄂州大火燔萬餘家江風暴作結廬隄上  
泊舟岸下者焚溺無遺十四年五月大內武庫災戎器

不害六月庚寅行都寶蓮山民居火延燒七百餘家救  
焚將校有死者五月成都府市火燔萬餘家十六年九  
月南劍州大火民居存者無幾紹興元年八月壬寅處  
州火燔數百家十二月戊申建寧府浦城縣火時查洞  
寇張海作亂焚五百餘家二年四月行都傳法寺火延  
及民居言者以戚里土木為孽火數起之應是月徽州  
大火夜燔州治譙樓官舍獄宇錢帑庫務凡十有九所  
五百二十餘區延燒千五百家自庚子至于壬寅乃熄

五月己巳金州火燔州治官舍帑藏保勝軍器庫城內  
外民居甚衆三年正月己巳行都火通夕至于翌日闕  
闔焚者半十一月又火燔五百餘家十二月甲辰鄂州  
火至于翌日燔八百家慶元二年八月己酉永州火燔  
三百家三年閏月甲申金州都統司中軍壘舍火焚千  
三百餘區閏六月乙酉又火燔二千餘區是冬紹興府  
僧寺火延燒數百家六年八月戊戌徽州火燔州獄官  
舍延及八百餘家嘉定元年三月戊寅行都大火至于



四月辛巳燔御史臺司農寺將作軍器監進奏文思御  
輦院大史局軍頭皇城司法物軍御厨班直諸軍壘延  
燒五萬八千九十七家城內外亘十餘里死者五十有  
九人踐死者不可計城中廬舍九燬其七百官多僦舟  
以居火作於寶蓮山御史臺胥楊浩家諫譏大夫程松  
請戮浩以謝都民疏再上始黥配萬安軍猶免決自是  
民訛言相驚亡賴因縱火為姦利二年六月己卯臨安  
府火三年正月丁酉襄陽府火作而風暴選鋒軍校于

友直死於救焚止延燒六十餘家帥漕臣上其功贈二秩官其子二十一月甲午福州火燔四百餘家四年三月丁卯行都大火燔尚書中書省樞密院六部右丞相府制勅糧料院親兵營修內司延及學士院內酒庫內宮門廡夜召禁旅救撲太室撤廟廡遷神主并冊寶於壽慈宮翼日戊辰旦火及和寧門鳴吻禁卒張隆飛梯斧之門以不焚火作時分數道燔二千七十餘家又翌日巳巳神主還太室時省部皆寓治驛寺四月丙申臨

安府梵天寺火六月盱眙軍天長縣禁軍營火鎧械為  
盡八月壬辰鄂州外南市火燔五百餘家開禧二年二  
月癸丑壽慈宮災四月壬子行都火燔數百家嘉定二  
年八月己巳信州火燔二百家九月丁酉吉州火燔五  
百餘家是歲瀘州火燔千餘家十一月丁亥建寧府政  
和縣火燔百餘家四年閏二月己卯紹興府嵯縣浦橋  
火燔百餘家三月滁州火燔民居甚多十月撫州火辛  
卯福州一夕再火燔城門僧寺延燒千餘家死者數人

五年五月己未和州火燔二千家八年八月辛丑湖州  
火燔寺觀延燒三百家九年七月甲戌南劍州沙縣火  
燔縣門官舍及千一百餘家民有死者十一年二月行  
都火燔數百家九月己巳禁垣外萬松嶺民舍火燔四  
百八十餘家十三年二月庚寅安豐軍故步鎮火燔千  
餘家死者五十餘人八月庚午慶元府火燔官舍第宅  
寺觀民居甚衆十一月壬子行都火燔城內外數萬家  
禁壘百二十區十七年四月丁卯西和州焚軍壘及居

民二千餘家人火之也守臣尚震午誤以為金人至而遁六月丁亥岳州火燔岳陽樓州獄帑庫延及八十家已丑又火燔百餘家紹定元年三月行都火燔六百餘家嘉熙元年六月臨安府火燔三萬家淳祐元年徽州火十二年十一月丙申行都火至丁酉夜始熄景定四年紹興火臨安府大火德祐元年玉牒所災

乾德二年冬無雪五年冬無雪開寶元年冬京師無雪二年冬無雪淳化二年冬京師無冰至道元年冬無雪

二年冬無雪大中祥符二年京師冬溫無冰天聖五年  
夏秋大暑毒氣中人嘉祐六年冬京師無冰治平四年  
冬無雪元豐八年冬無雪元祐元年冬無雪四年冬京  
師無雪五年冬無冰雪紹興五年五月大燠四十餘日  
草木焦槁山石灼人暍死者甚衆三十一年冬無雪乾  
道三年冬溫少雪無冰五年冬溫無雪六年冬溫無雪  
冰紹熙三年冬潼州路不雨氣燠如仲夏日月皆赤滎  
州尤甚慶元元年冬無雪二年冬無雪四年冬無雪越

歲春燠而雷六年冬燠無雪桃李華蟲不蟄開禧三年  
冬少雪嘉定元年春燠如夏六年冬燠而雷無冰蟲不  
蟄八年夏五月大燠草木枯槁百泉皆竭行都斛水百  
錢江淮杯水數十錢暍死者甚衆九年冬無雪十三年  
冬無冰雪越歲春暴燠土燥泉竭

建隆二年九月亳州獻芝一株乾德四年閏八月黃岡  
縣民段贊屋柱生紫芝一本二莖知州鄧守忠以獻十  
二月登州獻芝五莖開寶四年成都府民羅達家生芝

六年正月知梓州趙延通獻芝一本河中府大明觀殿  
芝草生節度使陳思議以聞七年七月陳州節度党進  
獻控鶴營卒孫洪家芝二本八月又獻芝一本四十九  
莖九月麻城縣廨芝生柱上刺史王明以獻十月梓州  
獻芝草太平興國二年八月青城縣民家竹一本上分  
雙莖三年六月項城縣令王元正獻芝草七月廣州獻  
芝草八月功臣堂柱生芝二本知州范旻畫圖以獻四  
年八月廣州獻芝草九月華山道士丁少微獻白芝黝



芝各一器五年五月蒼山縣竹一莖十四節上分二枝  
長丈四尺九月真定府行宮殿梁生芝如荷花知府趙  
賢進以圖來上十月龍水縣華嚴寺舊截竹為筒引水  
忽生枝葉生二丈許知州姜宣以聞六年三月廣州獻  
黃芝一本九莖七月新津縣趙豐村竹一莖十二節上  
分兩歧知州崔憲以聞七年六月知黃州斐仁鳳獻芝  
草七月知羅江縣陳覃於羅壩山獲芝四本以獻湘陰  
縣萬壽寺松根生芝草二本轉運副使趙昌獻之八月

再生四本昌又獻潭州民歐陽進夏侯敏園中芝三本  
宣興縣民長孫裕家生芝紫莖黃蓋十月雄州實信院  
竹叢生芝草僧致仁采之復生悉以上獻八年二月知  
福州何允昭獻芝二本五月漢州獻芝十月乙酉蜀州  
獻瑞竹一本十六節上分兩枝知連州史昭文獻芝二  
莖十一月婺源縣民王化於王陵山石上得紫芝一本  
叢生五莖金州監軍解生芝三本九年十月金州獻芝  
三本永康軍獻芝九莖同日至闕下十一月知梓州沈

護獲芝三莖雍熙二年七月靈州芝草生知州侯贊刻  
木為其狀來獻三年三月殿前承旨張思能使楚泗獻  
所得芝草五本四月眉山縣獻異竹圖八月刑部尚書  
宋琪家牡丹三華端拱元年五月知襄州郝正獻芝五  
本八月廣州鳳集合歡樹下得芝三本二年七月彭山  
縣民家生異竹舒州芝草生知州趙孚以獻十月密州  
獻芝草淳化元年四月永州監軍解芝草生知州克憲  
以聞八月黃州刺史魏丕獻芝草二年二月射洪縣安

國寺竹二莖同本六月舒州竹連理知州樂史以聞十一月陵州民趙崇家慈竹二莖長六尺許其二別有根抵莖分十枝長丈餘又一本三莖並聳三年十月朗州異竹生京師太平興國寺牡丹生華占云有喪是月恭孝太子薨四年正月知興化軍馮亮獻芝草十月藪門芝草生十二月榮州獻異竹圖五年正月密州獻芝草四本枝葉扶疎二月知溫州何士宗獻芝草五本十月又獻十本至道元年十一月潭州監軍廨生竹一本長

二尺許枝葉萬餘尤為殊異二年六月虔州龍泉縣合  
龍院一竿分兩枝河南縣民張知遠家芝草生判府呂  
蒙正表上之閏七月密州獻芝二本三年二月廣東轉  
運使康戩獻紫芝咸平元年十二月宣化縣保聖山瑞  
竹生一本二枝二年閏二月宣池歙抗越睦衢婺諸州  
箭竹生米如稻時民饑采之克食九月劍州驛廳梁上  
生芝草一枝三朶其色黃白知州李仁衡圖以獻四年  
正月濰州獻芝草一本如佛狀十二月知淮陽軍王礪

獻芝草三本六年五月導江縣民潘矩田生芝三層黃  
紫色高五寸許九月相州牧龍坊生芝一莖色紫黃長  
尺餘分七枝枝如手五指狀其最上枝類鳳者知州張  
鑑以獻景德三年八月蔡州獻芝草四年十月知廣安  
軍王竒上芝草圖十二月蓬州上瑞竹圖大元祥符元  
年四月温州獻瑞竹圖五月辛未以東封遣經度制置  
使王欽若祭文宣王廟於孔林得芝五株色黃紫如雲  
色及人戴冠冕之狀詔內侍楊懷玉祭謝復得芝四本

輕黃如雲氣之狀癸未內侍江德明於白龍潭石上得紫黃芝一本以獻六月瑕丘縣民宋固於堯祠前得黃紫芝九本連理者四又縣民蔡珍得芝一本王欽若以獻欽若又於岱嶽及堯祠前再得芝二十二本連理者二及有貫草石者七月欽若親獲芝十一本又州長及民所得二十六本有重臺連理及外白內紫之狀且言泰山至日生芝草軍民競采請給緡帛從之兗州獄空司理參軍郭保讓掃除其間得芝四本八月須城縣民

家芝草生乾封縣民家屋柱生芝滋長連表色鮮潔如  
繪畫欽若獻芝草八千一百三十九本有貫草木附石  
連理及飾為寶山者黃州獻異竹一本雙莖九月趙安  
仁來獻五色金玉丹紫芝八千七百十一本鞏縣柴務  
牡丹華十月泰山芝草再生者甚衆辛丑車駕次鄆州  
知州馬元方獻芝草五本甲辰欽若等又獻泰山芝草  
三萬八千五十本有並五連三連理者五色重暈如寶  
蓋下相連帶凡草木五穀如寶山靈禽瑞獸之象者六



百四十二詔令封禪日列天書輦前又送諸路名山勝  
景及賜宰相是月復州獻芝草類神仙佛像河中府酒  
厨梁上生芝一本十二葉其色如玉安陽縣段贊家紫  
芝連理長尺餘又民李釗屋柱生芝三本霍邱縣河亭  
及聖惠坊並有紫芝生十二月福州懷安縣龍眼樹上  
紫芝連理温州獻靈芝圖二年正月福州荔枝樹生連  
理芝二本二月饒州獻芝草四本七月遂州皇澤寺芝  
草生凡五十本九月榮州廨庭中生芝二本十月果州

青居山獻金暈連理芝草十一月華山張超谷石上生  
紫芝二本嵩岳生芝草五十本石首縣文宣王廟殿柱  
芝草生又龍蓋山萬福里民宗永昌園藤上芝草生一  
本雙莖十二月漢州芝草生黔州芝草一莖十二枝若  
山峰狀三年正月井研縣三惠寺生芝草十本二月昌  
州廨廳柱芝生四本閏二月饒州芝草生三月西充縣  
青蓮塔院太平觀並生芝草四月京師竹有華占云歲  
不豐六月緜邵鄂州並芝草生七月號州聖女觀生芝

草三本八月潁縣民得田芝十二本蜀州生芝草一莖  
九葉江陵縣民張仲家竹自根上分幹其一幹又分三  
莖九月江陵府永泰寺竹出地七節分為兩莖長丈餘  
知府陳堯咨以聞華州敷水民侯元則入華陽川石罅  
得芝一本知州顧端以獻十月內侍任文慶詣茅山設  
醮洞中獲芝草二十八本有如人手者十一月安鄉縣  
謝山獲芝二十二本其七狀如珊瑚而色紫十二月神  
泉縣獲芝四本四年正月知華州崔端獻芝草狀如仙

人掌湏城縣民李道安於黃仙公洞臺上得芝草一本  
以獻二月崔端又獻芝草十本知益州任中正獻芝草  
二十二本知遂州母賓古獻芝草四月古田縣僧舍竹  
一本上分三莖端昌縣民李讓家筓竹一本去地五尺  
許分為二莖知州范應辰以聞八月夔州芝草生廩舍  
中七月知亳州徐泌知江州王文震並獻芝草知彬州  
袁延慶獻芝草十本八月邕州雲封寺栢樹生芝五本  
知州劉知誥以獻西克縣廣川王廟生芝十本其三連

理八月知信州李放獻瑞竹圖三本十一月河中府獻  
芝草真源縣民王順慈司徒捷家生芝各一本岳州道  
州並獻芝草南嶽奉冊使薛映副使錢惟演過荆門軍  
神林石上獲芝草以獻十二月鉛山縣仁壽僧舍生芝  
草一本雙枝長尺八寸五年六月潯州六祖院法堂紫  
芝雙秀知州高志寧以聞八月亳州獻芝草十月澤州  
廳事梁上生白莖紫蓋芝二十四本閏十月常州芝草  
生又蕭山縣芝生李樹上十一本十一月廣州獻芝草

二百三十七本晉原縣僧舍芝草一本十二月隨州芝  
草生亳州獻鹿邑縣民所獲芝草四本侯官縣山上生  
芝草五十四本閩縣望泉寺生芝草十本寧德縣支提  
山石上生芝草十五本六年二月江州廬山崇聖院生  
芝九本知州王文震以獻四月饒州承天院東山生芝  
四本連葉六月壽邱縣獲紫莖金芝一本景陵縣管陽  
山林中獲芝三十本七月內侍石延福登兗州壽邱獲  
芝一本貫草而生又旁得三十本亳州團練使高漢英

獻芝八本鼎州城門柱下生芝一本八月繼照堂生芝一本紫莖黃蓋奉祀經度制置使丁謂至真源縣太清宮道士瀨陽鄉民繼獲芝八十本以獻乙丑又獲二百五十本有一本三莖一莖如雲氣佛像者九月又得宋城縣民所獲芝五十本獻之十月丁謂來朝獻芝草三萬七千一百八本飾以仙人寶禽異獸之狀十一月又獻九萬五千一百本明年車駕至真源民有詣行闕獻者又一萬八千本是冬兗州景靈宮芝草生慶成軍大

寧廟聖製碑閣生金芝二本昭州龍嶽山資壽寺芝草  
生潯州廳廨柱芝生一本上分為二其上又生二本凡  
三重無錫縣民曹詵家食案生芝赤黃有光長尺許又  
知南安軍章得一獻芝草七年正月明州獻茹侯山石  
上芝草一本四莖二月知信州歐陽陟獻芝草七本忠  
州獻芝五本四月福州獻芝草二本五月鄆縣西上石  
崖生紫芝十五本七月華州民入華山得白石上芝草  
雙莖連蓋八月均州獻州獻芝千二百二十七本十月



慶成軍大寧廟石雙莖芝生其上合幹明英二州芝草  
生十一月蜀州芝草二本生竹根八年二月青州武成  
王廟柱生芝一本知州張知白以圖獻三月榮州應靈  
縣彌陀佛舍生紫芝三本其一雙幹上如蓋四月昌州  
有芝生石上一本四莖其色黃白四月彰明縣民家竹  
一根上分二本十三節又開元寺桃竹一莖上分十八  
節皆相對五月道州舜祠旁生芝二十一本六月盩厔  
縣民家芝草三莖共成一葉又石芝一本十月晉原縣

民栢宸家生芝三根合為一本九年七月知信州董溫  
獻芝十二本八月知廬州余獻卿獻芝二本九月涪城  
縣石屏生芝一本十一月武岡縣民何文化園竹生兩  
株同本上分四莖十一月晉原縣民李彥滔家竹一本  
雙莖對節知州王世昌圖以獻天禧元年三月新津縣  
平益下玉皇案下芝草生鄂州天慶觀聖祖殿芝草生  
四月邵陽等縣竹生穗如米民饑食之又浮梁縣竹生  
穗如米七月漢陽軍太平興國寺異竹一本生二莖竹

皆相對十二月庚午內出芝草如真武像二年五月庚子內出真遊崇徽二殿梁上芝草圖示宰相五月兗州景靈宮昭慶殿生金芝二本三年六月漢陽軍芝草生一百五十餘本七月嵩山崇福宮獲芝草一百本有重臺連理貫草者知河南府馮拯以獻四年四月梁山軍民王崇辰竹園生金暈紫芝五本十一月上饒縣民王壽園中生芝草三本皆金暈其二連理乾興元年六月蘇秀二州湖田生聖米居民取以食興州竹有實如大

麥民取以食占曰大饑八月洋州民李永負土成母墳  
芝生墳上天聖元年五月興州竹有實如大麥民取以  
食之占曰竹有實大饑八月甲寅有芝生於天安殿柱  
召輔臣觀之九月戊午城西下木場芝草生三年七月  
梓州城門生芝二本四年正月梓州民家生芝四本九  
月榮州芝生明道元年七月榮州連州並芝生景祐二  
年九月嘉州芝草生四年五月丙寅有芝生於化成殿  
楹慶歷元年二月丙午京師雨藥二年八月梓州芝草

生五年八月洪州章江禪院堂柱芝草生高一尺三寸  
葉二十一層色白黃有紫暈旁生小芝葉九層上有氣  
如煙皇祐元年七月福州生芝一十二本十月湖州芝  
草生三年六月丁亥無為軍獻芝草凡三百五十本上  
曰朕以豐年為上瑞賢臣為寶至於草木魚蟲之異焉  
足尚哉五年閏七月榮州芝草生嘉祐三年十一月河  
南府芝草生六年正月清川縣漢光武祠生芝草一本  
三岐八月施州歌羅砦生芝四本十月汝州新砦巡檢

解舍生芝五本熙寧元年益陽縣雷震山裂出米可數十萬斛賈至京師信米也但色黑如炭八年七月鼎州產芝三本其一類珊瑚枝葉樛結鹽官縣自三月地產物如珠可食水產菜如菌可為菹饑民賴之九年五月流江縣產芝一十一本元豐二年四月眉山生瑞竹六月忠州雨豆七月甲午南賓縣雨豆十一月全州芝生十二本三年六月安州芝生二十九本其一連理臨江軍芝生四十三本四年十月鄴縣天慶觀生瑞竹一本

自第九節分莖雙起五年七月永康縣生紫芝九本十  
一月閩中縣生紫芝六金芝七永康縣生紫芝九六年  
八月吉州芝生三十三本十二月滕縣官舍生異草經  
月不腐七年四月景靈宮芝生六本於天元殿門五月  
開化縣芝生九本黃白紫色八月永安陵下宮芝生一  
本十月青州芝生二十一本元祐元年七月武安軍言  
前秘書省正字鄧忠臣母墳前生芝草一本紫莖黃蓋  
三年六月臨江縣塗井鎮雨白黍七月又雨黑黍四年

九月江津縣石上生芝草二本六莖五年二月晉原縣  
生芝草四十二本七年十一月滁州生芝二百餘本紹  
聖三年九月淄州縣生芝草有穀十科穿芝草生二枝  
十月河南府大內地生芝草元符二年正月處州民田  
生瑞竹二月瀘州生芝草一本同根駢幹至蓋復合為  
一又衡州郡廳生紫芝一根十六葉崇寧元年八月盤  
石縣芝草連理三年十月復州澤州芝草生四年正月  
戎州宿州芝草生七月瀘州芝草瑞竹生五年冬澶州



安州芝草生大觀元年三月宣鄆湖潤州皆芝草生廬  
州雨大豆九月崇天臺及兗州孔林芝草生二年陳兗  
筠州廣德軍芝草生三年秋西京湖海普渠州南安軍  
芝草生政和元年正月萊州芝草生十一月虔州聖祖  
殿芝草生二年二月戊子河南府新安縣蟾蜍背生芝  
草自是而後祥瑞日聞玉芝產禁中殆無虛歲凡殿宇  
園苑及妃嬪位皆有之外則中書尚書二省太學醫學  
亦產紫芝四年八月建州境內竹生米數千萬石三年

十一月癸酉越州承天寺瑞竹一竿七枝幹相似其葉  
圓細生花結實詔送秘書省仍拜表賀五年五月禁中  
芭蕉連理八月甲子蘄州進芝草一萬一千六百枝內  
一枝紫色九幹十二月己未汝州進六萬本其間連理  
雙枝者一千八百八十有司不勝其紀初猶表賀後以  
為常不皆賀也時朱勝非為京東提舉學事行部至密  
州界見縣令部數百夫入山採芝彌漫山谷皆芝菌也  
或附木石或出平地有一本數千葉層疊高大衆色咸

備郡守李文仲採及三十萬本每萬本作一綱入貢文  
仲尋進職授本道轉運使建炎二年九月癸卯權知密  
州杜彥獻芝草五葉如人指掌色赤而澤宰相黃潛善  
奏色符火德形像股肱之瑞高宗不啟視却之紹興元  
年七月乙未浙西安撫大使劉光世以枯桔生穗奏瑞  
高宗曰朕在潛邸梁間生芝草官僚皆欲上聞朕手碎  
之不欲寶此竒恠乃却之十六年正月辛未瀘州天雨  
豆近草妖也十六年梅州孔子廟生芝二十一年紹興

府學御書下生芝番陽縣石門民家籬竹生重萼牡丹  
又民家竈鼎生金色蓮華房州治所綵山下生蕙萬州  
虔州放生池生蓮皆同蒂異萼二十三年六月汀州生  
蓮同蒂異萼者十有三十五年五月太室楹生芝九  
莖秦檜帥百官觀之稱賀勾龍廉沈中立以獻頌遷擢  
周麟之請繪之鹵簿行旗檜孫禮部侍郎埶請以黎州  
甘露降草木道州連理木鎮江府瑞瓜嚴安軍瑞蓮嚴  
信州瑞芝悉圖之旗是冬檜薨高宗曰比年四方奏瑞

文飾取悅若信州林機奏秦檜父祠堂生芝佞諛尤甚  
明年四月甲午詔郡國無獻瑞乾道元年七月池州竹  
生穗實如米饑民采之以食守臣魯訢為野穀生竹圖  
以獻御史劾訢不以民食草木為病坐佞免官慶元五  
年八月太室西北夾室楹生白芝四葉前史以白芝為  
喪祥明年八月國連有大喪嘉泰二年十一月秘書省  
右文殿楹生芝二莖

宋史卷六十三

宋史卷六十三考證

五行志二火上建隆元年宿州火○按應提行寫

諫議大夫程松○按諫譏是諫議之訛

二年六月虔州龍泉縣合龍院一竿分兩枝○臣召南

按一竿上脫竹生二字前後文可証也

宋史卷六十三考證